

明史藁

列傳第一百六十一

光祿大夫

經筵講官明史總裁戶部尚書加七級臣王鴻緒等

敕編撰

文苑一

楊維禎

陸居仁錢惟善

胡翰

蘇伯衡

王冕

郭銜

戴良

王冕

趙壘

陳壘

徐夔

顧德輝

貝瓊

趙撝謙

樂良等

陶宗儀

張憲等

丁鶴年

袁凱

高啓

唐肅克等

楊基

張羽

徐賁

王行

孫作

孫黃

王佐等

王蒙

郭傳

明初文學之士承元季虞柳黃吳之後師友講習學有本原
宋濂王禕方孝孺以文雄高楊張徐劉基袁凱以詩著其他
勝代遺逸風流標映不可指數蓋蔚然稱盛已永宣以還作
者遞興皆冲融演迤不事鉤棘而氣體頗弱弘正之間李東
陽出入宋元溯流唐代而李夢陽何景明倡言復古文自西
京詩自大曆而下一切吐棄操觚談藝之士翕然宗之明之
詩文於斯爲一變迨嘉靖時王慎中唐順之輩文宗歐曾詩
倣初唐李攀龍王世貞輩文主秦漢詩規盛唐王李之持論
大率與夢陽景明相倡和也歸有光頗後出以司馬歐陽自
命力排李何王李而徐渭湯顯祖袁宏道鍾惺之屬亦各爭
鳴一時於是宗李何王李者稍衰至啓禎時錢謙益艾南英

準北宋之矩矱張溥陳子龍擷東漢之芳華明之詩文又一變矣有明一代文士卓卓表見者其源流大抵如此今博考諸家之集參以衆論錄其著者作文苑傳

楊維禎字廉夫山陰人母李有妊夢月中金錢墜懷翼日而生維禎少時日記書數千言父宏築樓鐵崖山中繞樓植梅百株聚書數萬卷去其梯俾誦讀樓上者五年因自號鐵崖元泰定四年成進士署天台尹改錢清場鹽司令狷直忤物十年不調會修遼金宋三史成維禎著正統辨千餘言總裁官歐陽原功讀且歎曰百年後公論定於此矣將薦之而不果轉建德路總管府推官擢江西儒學提舉未上會兵亂避地富春山徙錢塘張士誠累招之不赴遣其弟士信咨訪之

因撰五論具書復士誠反覆告以順逆成敗之說士誠不能用也又忤達識丞相徙居松築元圃蓬臺於松江之上海內薦紳大夫與東南才俊之士造門納履無虛日酒酣以往筆墨橫飛或戴華陽巾披羽衣坐船屋上吹鐵笛作梅花弄或呼侍兒歌白雪之辭自倚鳳琶和之賓客皆踟躕起舞以爲神仙中人太祖自初起兵時雅聞維楨名洪武二年召諸儒纂禮樂書以維楨前朝老文學遣翰林詹同奉幣詣門維楨謝曰豈有老婦將就木而再理嫁者邪明年復遣有司敦促賦老客婦謠一章進御曰皇帝竭吾之能不強吾所不能則可否則有蹈海死耳帝許之賜安車詣闕廷留百有一十日所纂敘例略定卽乞骸骨帝成其志仍給安車還山史館胄

監之士祖帳西門外宋濂贈之詩曰不受君王五色詔白衣
宣至白衣還蓋高之也抵家疾亟撰歸全堂記頃刻而就曰
九華伯潘君迎我擲筆而逝時庚戌五月年七十五郡守及
其門人葬之干山東麓所著書凡數百卷行世維楨詩名擅
一時學者宗之號鐵崖體平生與永嘉李孝光茅山張雨錫
山倪瓚崑山顧瑛爲詩文友碧桃叟釋臻知歸叟釋現清容
叟釋信爲方外友張雨稱其古樂府出入少陵二李間有曠
世金石聲宋濂稱其論撰如覩商敦周彝雲雷成文而寒芒
橫逸詩震蕩凌厲鬼設神施尤號名家云維楨徙松江時與
華亭陸居仁及僑居錢惟善相倡和惟善字思復錢塘人至
正元年省試羅刹江賦時鎖院三千人獨惟善据枚乘七發

辨錢塘江爲曲江由是得名號曲江居士官副提舉張士誠據吳遂不仕居仁字宅之中泰定三年鄉試隱居教授自號雲松野衲兩人旣歿與維禎同葬于山人目爲三高士墓胡翰字仲申金華人幼聰穎異常兒七歲時道拾遺金坐守其人而還之長從蘭谿吳師道游博習經史已從浦江吳萊學古文復登同邑許謙之門學益邃同郡黃潛柳貫以文章名天下見翰文稱之不容口游元都公卿交譽之與武威余闕宣城貢師泰尤善或勸之仕不應旣歸遭天下大亂避地南華山著書自適文章與宋濂王禕相上下太祖下金華召見命與許元等會食中書省後待臣復有薦翰者召至金陵時方籍金華民爲兵翰從容進曰金華人多業儒鮮習兵籍

之徒糜餉耳太祖卽罷之授衢州教授洪武初聘修元史書
成受賚歸愛北山泉石卜築其下徜徉十數年而終年七十
有五所著有春秋集義文曰胡仲子集詩曰長山先生集
蘇伯衡字平仲金華人宋門下侍郎轍之裔也父友龍受業
許謙之門官蕭山令行省都事並有樹立明師下浙東坐長
子仕閩謫徙滁州李善長奏官之力辭歸伯衡警敏絕倫博
洽羣籍爲古文有聲元末貢於鄉太祖置禮賢館伯衡與焉
歲丙午用爲國子學錄遷學正被薦召見擢翰林編修力辭
老曠不就乞省覲歸洪武十年學士朱濂致仕太祖問誰可
代者濂對曰伯衡臣鄉人學博行修文詞蔚瞻有法太祖卽
徵之入見復以疾辭賜衣鈔而還二十一年聘主會試事竣

復辭還尋爲處州教授坐表箋譴下吏死二子恬怡救父并
被刑

王冕字元章諸暨人幼貧父使牧牛竊入學舍聽諸生誦書
暮乃返念其牛父怒撻之已而復然母曰兒癡如此曷不聽
其所爲冕因去依僧寺夜坐佛膝上映長明燈讀書會稽韓
性聞而異之錄爲弟子遂稱通儒性卒門人事冕如事性屢
應舉不中棄去北游燕都客秘書卿秦不花家擬以館職薦
力辭曰不十年此中狐兔游矣何以任爲旣歸每大言天下
將亂攜妻孥隱九里山樹梅千株桃杏半之自號梅花屋主
善畫梅求者踵至以幅長短爲得米之差嘗做周官著書一
卷曰吾未卽死持此遇明主伊呂事業不難致也太祖卜婺

州物色得之置幕府授議參軍一夕病卒同時郭奎鏗
皆早參戎幕以詩名奎字子章巢縣人從余闕學治經闕
稱之太祖爲吳國公來歸從事幕府朱文正開大都督府
南昌命奎參其軍事文正得罪奎坐誅炳字彥昂鄱陽人至
正中從軍於浙太祖起淮南獻書言事用爲中書典籤洪武
初從事大都督府出爲知縣閱兩考以病告歸久之卒

戴良字叔能浦江人通經史百家醫醫卜釋老之說初習科
舉業已棄去學古文於黃潛柳貫吳萊貫卒經紀其家歲戊
戌太祖定金華良入謁語及時事太祖大悅命與胡翰等十
二人會食省中日輪二人講經史陳治道明年用良爲學正
與宋濂葉儀輩訓諸生太祖旣旋師良忽棄官逸去辛丑元

順帝用薦者言授良江北行省儒學提舉良見時事不可爲
避地吳中依張士誠久之見士誠將敗挈家泛海抵登萊欲
間行歸擴廓軍道梗寓昌樂數年洪武六年始南還變姓名
隱四明山太祖物色得之十五年召至京師試以文命居會
同館日給大官膳欲官之以老疾固辭忤旨明年四月暴卒
蓋自裁也良世居金華九靈山下自號九靈山人有文集三
十卷蘇伯衡贊其像曰其跋涉道途也類子房之報韓其徬
徨山澤也猶正則之自放蓋元亡後惟良與王逢不忌故主
每形於歌詩而太祖終以良前事爲嫌故卒不獲其死云逢
字原吉江陰人至正中作河清頌臺臣薦之稱疾辭張士誠
讓吳其弟士德用逢策北降於元以拒明太祖滅士誠欲辟

臥不起隱居上海之烏涇歌咏自適洪武十五年以
學徵有司敦迫上道時子掖爲通事司令以父年高叩頭
以請乃命吏部符止之又六年卒年七十有梧溪詩集七卷
逢自稱席帽山人

趙堦字伯友新喻人好學工屬文元至正中舉於鄉爲上猶
教諭洪武二年太祖將修元史諭廷臣曰近克元都得其十
三朝實錄國雖亾事當紀載況史識成敗示勸懲不可廢也
乃命左丞相李善長爲監修官前起居注宋濂漳州府通判
王禕爲總裁官徵山林遺逸之士汪克寬胡翰宋僖陶凱陳
基曾魯高啓趙汭張文海徐尊生黃箎傅恕王綺傅著謝徽
爲纂修官而堦與焉以是年二月開局天界寺取元經世大

典諸書用資參考至八月成諸儒竝賜賚遣歸而順帝一朝
史猶未備乃命儒士歐陽佑等往北平采其遺事明年二月
還朝詔重開史局仍以宋濂王禕爲總裁徵四方文學士十
四人爲纂修堦復與焉十四人者堦及朱右貝瓊朱廉王彛
張孟兼高遜志李懋李汶張宣張簡杜寅殷弼俞寅也先後
纂修三十人兩局竝與者堦一人而已閱六月書成諸儒多
授官惟堦及朱右朱廉不受歸尋召修日曆授翰林編修高
麗遣使朝貢賜宴樂作使者以國喪辭堦進曰小國之喪不
廢大國之禮太祖甚悅命與宋濂同職史館濂兄事之嘗奉
詔撰甘露頌太祖稱善出爲靖江王府長史卒始與堦同纂
修者汪克寬陶凱曾魯高啓趙汭貝瓊高遜志竝有傳合

宋僖以下可考者附著於篇僖字無逸餘姚人元繁昌教諭
遭亂歸史事竣命典福建鄉試基字敬初臨海人少與兄聚
受業於義烏黃潛從潛游京師授經筵檢討嘗爲人草諫章
力陳順帝竝后之失順帝知而怒欲罪之引避歸里已奉母
入吳教授自給江南用兵元開行樞密院起基爲都事轉江
西行省郎中參張士信軍事自杭赴吳復參太尉張士誠軍
事士誠稱王基獨諫止欲殺之不果已超授內史遷學士吳
平召修元史賜金而還洪武三年冬卒於常熟旅舍初士誠
與太祖相持基在其幕府書檄多指斥及吳亡吳臣多見誅
基獨免世所傳夷白集其指斥之文猶備列云文海鄞人與
同里傅恕竝入史館尊生字大年淳安人元史成受賜歸復

同修日曆後宋濂乞致仕太祖問誰可代者濂以尊生對乃授翰林應奉文字章制稱旨尋以老疾辭還恕字如心鄞人學通經史與同郡烏斯道鄭直皆有文名洪武二年詣闕陳治道十二策曰正朝廷重守令馭外蕃增祿秩均民田更法役黜異端易服制興學校慎選舉罷權鹽停權茶太祖嘉納之遂命修元史事竣授博野知縣後坐累死斯道字繼善慈谿人與兄本良俱有學行洪武中斯道被薦授石龍知縣調永新坐事謫役定遠放還卒斯道工古文子熙亦負才名直字子之洪武四年舉鄉試第一授臨淮教諭入見賜之宴武詩稱旨除廣信教授自號滎陽外史著字則明長洲人史常熟教諭魏觀行鄉飲酒禮長洲教諭周敏侍其父

南老著待其父玉皆降而北面立觀禮者以爲盛事焉歷官
知府卒徽字元懿長洲人史成授翰林國史院編修尋擢吏
部郎中力辭不拜歸後起國子助教卒徽博學工詩文與同
邑高啓齊名弟恭字元功亦能詩右字伯賢臨海人元末屢
舉不就洪武初朱濂薦修元史史成辭歸已徵修日曆寶訓
授翰林編修遷晉府右長史九年卒官康字伯清義烏人幼
力學淹通經傳長從黃潛學古文遂以文章名知府王宗顯
辟教郡學李文忠鍾廢州延爲鈞臺書院山長洪武初元史
成不受官歸尋徵修日曆除翰林編修八年扈駕中都進詩
十章太祖稱善爲和六章賜之已而授楚王經遷楚府右長
史久之辭疾歸康好程朱之學嘗取朱子語類摘其精義名

曰理學兼善尋常察其先蜀人父爲崑山教授遂卜居嘉定抄孤貧讀書天台山中師事王真文得蘭谿金履祥之傳學有端緒嘗著論爲詆楊維禎目爲文妖元史成賜銀幣選又以薦入翰林母老乞歸坐知府魏觀事與高啓俱被殺孟兼浦江人名下以字行史成授國子學錄歷禮部主事太常司丞自負能文奴視儕輩劉基嘗爲太祖書今天下文章宋濂第一其次卽臣基又次卽孟兼太祖領之孟兼爲基所稱愈自負嘗坐累謫輸作已復官太祖欲用越僧願證問濂嘗見其文否濂言孟兼有其文太祖色孟兼以願證文進太祖願孟兼謂濂曰卿門人邪濂對非門人乃邑子也其爲文有才臣劉基嘗稱之太祖熟視孟兼曰生骨相薄仕宦徐徐乃

可耳未幾用爲山西僉事廉劾疾惡紆摘奸猾令相牽引每
事輒株連數十人吏民聞張僉事行部凜然墮膽聲聞於朝
擢山東副使布政使吳印者僧也太祖驟貴之寵眷甚孟兼
易之印謁孟兼由中門入孟兼謂已憲司印不當入中門召
守卒予杖已又以他事與相拄太祖先入印言逮管孟兼孟
兼憤捕爲印書奏者欲論以罪印復上書言狀太祖大怒曰
豎儒與我抗邪械至闕下命衛士捽髮毆垂死棄市願證者
會稽人李姓爲僧好儒學善古文擢應奉翰林文字賜名證
居數月卒官汶字宗茂富塗人博學多才史成除巴東知縣
移南和晚年歸里以經學訓後進宣字藻重江陰人洪武初
以考禮徵尋預修元史太祖親書其名召對殿廷卽日授翰

林編修呼爲張家小秀才奉詔歸娶年已三十矣六年坐事
謫徙濠梁道卒簡字仲簡吳縣人初師張雨爲道士隱居鴻
山元季兵亂以母老歸養遂返儒服洪武三年薦修元史當
元季浙東西士大夫以文墨相尚每歲必聯詩社聘一二文
章鉅公若楊維禎輩並之四方名士畢至譙賞窮日夜詩勝
者輒有厚贈臨川饒介爲元淮南行省參政居吳中風流好
客豪於詩自號醉樵嘗大集諸名士賦醉樵歌簡詩第一贈
黃金一餅高啓次之得白金三斤楊基又次之猶贈一鎰一
時文會之盛唐宋以來未有也杜寅字彥正吳縣人史成官
岐寧衛知事洪武八年番賊旣降復叛寅與經歷熊鼎俱被

害

徐一夔字大章天台人工文與義烏王禕善洪武二年八月詔纂修禮書一夔及儒士梁寅劉子曾魯周子諒胡行簡劉宗弼董彝蔡深滕公琰竝與焉明年書成將續修元史禕方爲總裁官以一夔薦一夔遺書曰邇者縣吏傳命言朝廷以續修元史見徵且云執事謂僕善敘事薦之當路私心竊怪執事何惓惓於不材多病之人也僕素謂執事知我今自審終不能副執事之望何也近世論史者莫過於日曆日曆者史之根柢也自唐長壽中史官姚璠奏請撰時政記元和中華執誼又奏撰日曆日曆以事繫日以日繫月以月繫時以時繫年猶有春秋遺意至於起居注之說亦專以甲子起例蓋紀事之法無踰此也往宋極重史事日曆之修諸司必關

侍如諸詔則三省必書其機邊務則樞詞必報百官之進退
刑賞之予奪臺諫之劾劾各之繳駁經筵之論荅臣僚之
轉對侍從之直前唐書中外之褒貶歷奏下至錢穀甲兵獄
訟造作凡有關政體者無不應日以錄猶患其出於吏牘或
有訛失故歐陽修奏請宰相監修者於歲終檢點修撰官日
所錄事有失職者罰之如此則日曆不至訛失他時會要之
修取於此實錄之修取於此百年之後紀志列傳取於此此
宋氏之史所以為精確也元朝則不然不置日曆不置起居
注獨中書置時政科遣一文學掾掌之以事付史館及一帝
崩則國史院據所付修實錄而已其於史事固甚疎略幸而
大曆間虞集倣六典法纂經世大典一代典章文物粗備是

以前局之史既有十三朝實錄又有此書可以參稽而一時纂修諸公如胡仲申陶中立趙伯友趙子常徐大年輩皆有史才史學厯而成書至若順帝三十六年之事既無實錄可據又無參稽之書惟憑采訪以足成之竊恐事未必覈也言未必馴也首尾未必穿貫也而向之數公或受官或還山復各散去乃欲以不材多病如僕者承之於後僕雖欲仰副執事之望曷以哉舟至嘉興驛足疾大作不能前謹奉狀左右乞賜矜察一夔遂不至未幾用薦署杭州教授名修六明日曆書成將授翰林院官又以足疾辭賜文綺遣還

顧德輝字仲瑛崑山人家世素封輕財結客豪宕自喜年三十始折節讀書購古書名畫彛鼎祕翫築別業於茜涇西曰

玉山佳處晨夕與客置酒賦詩其中四方文學士河東張翥會稽楊維禎天台柯九思永嘉李孝光方外士張雨于彥成琦元璞輩咸主其家園池亭榭之盛圖史之富暨餼館聲伎竝冠絕一時而德輝才情妙麗與諸名士亦略相當嘗舉茂才授會稽教諭辟行省屬官皆不就張士誠據吳欲強以官去隱於嘉興之合溪尋以子元臣爲元水軍副都萬戶封德輝武略將軍飛騎尉錢塘縣男母喪歸綽溪士誠再辟之遂斷髮廬墓自號金粟道人及吳平父子竝徙濠梁洪武二年卒

貝瓊字廷琚一名闕字廷臣崇德人性坦率篤志好學年四十八始領鄉薦張士誠據平江屢徵不就洪武初聘修元史

既成受賜歸六年以儒士舉至京師除國子助教太祖嘗坐
奉天殿召瓊及諸助教趙俶錢宰鄭濤等論曰汝一以孔子
所定書訓課諸生若蘇秦張儀由戰國尚詐故得行其說慎
勿以爲教瓊等頓首受命瓊嘗慨古樂不作爲大韶賦以見
志宋濂之爲司業也建議立四學竝祀舜禹湯文爲先聖太
祖既絀其說瓊復爲釋奠解駁之識者多是瓊議九年以本
官改中都國子監教勲臣子弟瓊學行素優雖將校武夫皆
知禮重十一年致仕歸未幾卒子翔字季翔官楚府紀善亦
能詩

趙撝謙名古則更名謙餘姚人幼孤貧寄食山寺長游四方
人有一善一能輒往訪隆寒溽暑恆徒步走百餘里與朱右

謝肅徐一夔輩定文字交天台鄭四表善易則從之受易定
海樂良鄞鄭真明春秋山陰趙倅長於說詩迮雨善樂府廣
陵張昱工歌詩無爲吳志淳華亭朱芾工草書篆隸搗謙悉
與爲友博究六經百氏之學尤精六書作六書本義復作聲
音文字通時目爲考古先生洪武十二年命詞臣修正韻搗
謙年二十有八應聘入京師授中都國子監典簿久之以薦
召爲瓊山縣學教諭二十八年卒於番禺其後門人柴欽字
廣敬以庶吉士與修永樂大典進言其師所撰聲音文字通
當采錄遂奉命馳傳卽其家取之樂良字季本迮雨字一霖
趙倅字本初洪武中官國子監博士以年老乞歸加翰林待
制張昱字光弼廬陵人仕元爲江浙行省左右司員外郎行

樞密院判官留居西湖壽安坊貧無以葺廬凌雲翰爲疏募
焉酒間爲瞿佑誦所作詩笑曰我死埋骨湖上題曰詩人張
員外墓足矣營生壙於赤岸曰樂丘太祖徵至京憫其老曰
可閒矣厚賜遣還乃自號可閒老人年八十三卒吳志淳字
主一元末知靖安都昌二縣奏除待制翰林爲權倖所阻避
兵於鄆朱芾字孟辨洪武初官編修改中書舍人

陶宗儀字九成黃巖人父煜元福建江西行樞密院都事宗
儀少試有司一不中卽棄去務古學無所不窺出游浙東西
師事張翥李孝光杜本爲詩文咸有程度尤刻志字學習舅
氏趙雍篆法甚工家貧教授松江自給浙帥秦不華南臺御
史丑驢舉爲行人又辟爲教官皆不就張士誠據吳署爲軍

詔亦不赴洪武四年詔徵天下儒士六年命有司舉人才皆及宗儀引疾不赴晚歲有司聘爲教官非其志也二十九年率諸生赴禮部試讀大誥賜鈔歸久之卒初宗儀客松江躬親稼穡作勞之暇休於樹陰有所得摘葉書之貯一破盎去則埋之樹根如是十年積盎以十數一日令門人發而錄之得三十卷名曰輟耕錄又茸說邪書史會要四書備遺竝傳於世元末文人最盛其時以詞學知名者又有張憲周砥高明藍仁之屬憲字思廉山陰人學詩於楊維禎最爲所許負才不羈嘗走京師恣言天下事衆駭其狂還入富春山混緇流以自放一日升高望遠呼所親語曰禍至矣亟去三日而寇至死者五百家後仕張士誠爲其樞密院都事吳平變姓

名寄食杭州報國寺以歿砥字履道吳人僑無錫博學工文
詞與宜興馬治善遭亂往客治鄉治爲具舟車盡窮陽羨山
溪之勝其鄉多富人與治善者咸置酒招砥砥心厭之一日
貽書別治夜半遁去歸吳與高啓楊基諸人游書畫益工去
游會稽歿於兵治字孝常亦能詩洪武時爲內丘知縣終建
昌知府明字則誠永嘉人第至正五年進士授處州錄事辟
行省掾方國珍叛省臣以明諳海濱事擇以自從與論事不
合及國珍就撫欲留置幕下卽日解官旅寓鄞之櫟社太祖
聞其名召之以老疾辭還卒於家仁字靜之弟智字明之崇
安人元時清江杜本隱武夷崇尚古學仁兄弟俱往師之授
以四明任士林詩法遂謝科舉一意爲詩後辟武夷書院山

長遷邵武尉不赴明初內附例徙濠梁數月放歸以老壽終
智洪武十年被薦起家廣西僉事著廉聲

丁鶴年回回人曾祖阿老丁與弟烏馬兒皆巨商元世祖征
西域軍乏饟老丁杖策軍門盡以貲獻遂令從征徇下西北
諸國及論功以年老不願仕賜田宅京師奉朝請烏馬兒累
官甘肅行省左丞父職馬祿丁以世廕爲武昌縣達魯花赤
有惠政解官留葬其地至正壬辰武昌被兵鶴年年十八奉
母走鎮江母歿鹽酪不入口者五年復避地四明方國珍據
浙東最忌色目人鶴年轉徙逃匿爲童子師或寄僧舍賣漿
自給越十載海內大定牒請還武昌而生母已道阻前死瘞
東村廢宅中慟哭行求母骨以夢乃嚙血沁骨斂而葬焉烏

斯道爲作丁孝子傳鶴年自以家世仕元不忘故國順帝北
遁後飲泣賦詩情詞悽惻晚學浮屠法廬居父墓以永樂中
卒鶴年好學洽聞精詩律楚昭莊二王咸禮敬之正統中憲
王刻其遺文行世

袁凱字景文松江華亭人元末爲府吏博學有才辨議論
發往往屈座人洪武三年薦授御史武臣恃功驕恣得罪者
漸衆凱上言諸將習兵事恐未悉君臣禮請於都督府延通
經學古之士令諸武臣赴都堂聽講庶得保族全身之道帝
敕臺省延名士直午門爲諸將說書後帝慮囚畢命凱送皇
太子覆訊多所矜減凱還報帝問朕與太子孰是凱頓首言
陛下法之正東宮心之慈帝以凱老猶持兩端銜之凱懼託

瘋疾告歸帝遣人密謂之以佯狂免久之以壽終凱工詩有盛名性詼諧自號海叟背戴烏巾倒騎黑牛游行九峰間好事者至繪爲圖初在楊維禎座客出所賦白燕詩凱微笑別作一篇以獻維禎大驚賞徧示座客人遂呼袁白燕云

高啓字季迪長洲人博學工詩家北郭與王行比鄰其後徐賁高遜志唐肅宋克余堯臣張羽呂敏陳則皆卜居與相近號北郭十友又以能詩號十才子張士誠據吳名士響集啓獨依外家居吳淞江之青丘饒介之丁仲容素以詩自豪見啓詩驚異禮爲上客啓謝去仍隱青丘自號青丘子洪武初被薦偕同縣謝徽召修元史授翰林院國史編修官復命教授諸王三年秋帝御闕樓啓徽俱入對擢啓戶部右侍郎徽

吏部郎中啓自陳年少不敢當重任徽亦固辭乃見許已斌
賜白金放還啓嘗賦詩有所諷刺帝嫌之未發也及歸居青
丘授書自給知府魏觀爲移其家人郡旦夕延見甚歡觀以
改修府治獲譴帝見啓所作上梁文因發怒腰斬於市年三
十有九明初吳下多詩人啓與楊基張羽徐賁稱四傑以配
唐王楊盧駱云肅字處敬越州山陰人通經史兼習陰陽醫
卜書數少與上虞謝肅齊名稱會稽二肅至正壬寅舉鄉試
仕張士誠爲杭州黃岡書院山長遷嘉興路儒學正士誠敗
例赴京尋以父喪還洪武三年用薦召修禮樂書擢應奉翰
林文字其秋科舉行爲分考官免歸六年謫佃濠梁卒子之
淳字愚士宋濂亟稱之建文二年用方孝孺薦擢翰林侍讀

與孝孺共領修書事卒於官謝肅官至福建僉事坐事死克
字仲溫長洲人偉軀幹博涉書史少任俠好擊劍走馬家素
饒結客飲博盡喪其貲迨壯謝酒徒學兵法周流無所遇歸
家蓋以氣自豪張士誠欲羅致之不就性抗直與人議論期
必勝援古切今人莫能難也杜門染翰日費十紙遂以善書
名天下時有宋廣字昌裔亦善草書遂稱二宋洪武初克仕
鳳翔同知卒堯臣字唐卿永嘉人客越州張士誠參政呂珍
羅致幕下已入吳爲士誠客城破例徙濠梁洪武二年放還
授新鄭丞敏字志學無錫人元時爲道士洪武初官無錫教
諭十三年舉人才不知其官所終則字文度崑山人洪武六
年舉秀才授應天府治中俄擢戶部侍郎以閱實戶口出爲

大同府同知進知府

楊基字孟載其先蜀嘉州人祖宦吳中生基遂家焉九歲背誦六經及長著書十萬餘言名曰論鑿試禮部不利遭亂隱吳之赤山張士誠辟爲丞相府記室未幾辭去客饒介所明師下平江基以饒氏客安置臨濠旋徙河南洪武二年放歸尋起爲滎陽知縣謫居鍾離被薦爲江西行省幕官以省臣得罪落職六年起官奉使湖廣召還授兵部員外郎遷山西副使進按察使被讒奪官謫輸作竟卒於工所初會稽楊維禎客吳中以詩自豪基座上賦鐵笛歌維禎驚喜與俱東語從游者曰吾在吳又得一鐵矣若曹就之學優於老鐵學也張羽字來儀後以字行更字附鳳本溇陽人從父宦江浙兵

阻不獲歸與友徐賁約卜居吳興領鄉薦爲安定書院山長再徙於吳與高啓楊基輩爲詩友洪武四年徵至京師應對不稱旨放還再徵授太常司丞太祖重其文十六年自述滁陽王事命羽撰廟碑尋坐事竄嶺南未半道召還羽自知不免投龍江以死羽文章精潔有法尤長於詩作畫師小米

徐賁字幼文其先蜀人徙常州再徙平江工詩善畫山水張士誠辟爲屬已謝去居湖州蜀山吳平謫徙臨濠洪武七年被薦至京九年春奉使晉冀有所廉訪暨還檢其橐惟紀行詩數首太祖悅授給事中改御史巡按廣東又改刑部主事遷廣西參議以政績卓異擢河南左布政使大軍征洮岷道其境坐犒勞不時下獄瘐死

王行字止仲吳縣人幼隨父依賣藥徐翁家徐媪好聽稗官
小說行日記數本爲媪誦之媪喜言於翁授以論語明日悉
成誦翁大異之俾盡讀家所有書遂淹貫經史百家言未弱
冠謝去授徒齊門名士咸與交饒介居吳自號醉樵爲作詩
歌者甚衆行卽席爲賦介大喜疏薦之未及用富人沈萬三
延之家塾每文成酬白金鎰計行輒磨去曰使富而可守則
燃臍之慘不及矣洪武初有司延爲學校師已謝去隱於石
湖其二子役於京行往視之涼國公藍玉館於家數薦之太
祖得召見後玉誅行父子亦坐死始吳中用兵所在多列砲
石自固行私語所知曰兵法柔能制剛若植大竹於地繫布
其端砲石至布隨之低昂別人不能害而砲石無所用矣後

常遇春取平江果如其法行亦自負知兵以及於禍云

孫作字大雅江陰人爲文醇正典雅動有據依嘗著書十二篇號東家子宋濂爲作東家子傳元季挈家避兵於吳盡棄他物獨載書兩籠張士誠廩祿之旋以母病謝去客松江衆爲買田築室居焉洪武六年聘修大明日曆授翰林編修乞改太平府教授召爲國子助教尋分教中都踰年還國學擢授司業歸卒於家

孫蕢字仲衍廣東順德人性警敏書無所不窺詩文援筆就詞采爛然負節槩不妄交游元季避亂山澤間何真據嶺南開府辟士與王佐趙介李德黃哲竝受禮遇稱五先生廖永忠南征蕢爲真草降表永忠辟典教事洪武三年始行科舉

蕡與其選授工部織染局使遷虹縣主簿兵燹後瘡痍未起
蕡勞徠安輯民多復業居一年召爲翰林典籍爲宋濂樂韶
鳳詹同輩所稱名籍甚與修洪武正韻九年遣監祀四川居
久之出爲平原主簿坐累逮繫俾築京師望都門城垣蕡
嗟爲粵聲王者以奏召見命誦所歌詩語皆忠愛乃釋之十
五年起爲蘇州經歷復坐累戍遼東已大治藍玉黨蕡嘗爲
玉題畫遂論死臨刑吟詩長謳而逝時門生黎貞亦戍遼東
蕡屍乃得收斂貞字彥晦新會人工詩文嘗爲本邑訓導以
事被誣戍遼陽十八年從游者甚衆放還卒蕡所著有通鑑
前編綱目孝經集善理學訓蒙及西菴集和陶集多佚不傳
番禺趙純稱其究極天人性命之理爲一時儒宗云佐字彥

舉先河東人元末侍父官南雄經亂不能歸遂占籍南海與
蕢結詩社構辭敏捷佐不如蕢句意沈著蕢亦不如佐何真
使佐掌書記參謀議李質在肇慶真恐其有異志遣佐蕢二
人往說之自是修好不絕質愛士重文學士多歸之佐還言
於真遣使招致士以一藝名者真皆館穀之嶺南人文號極
盛真歸朝佐亦還里洪武六年被薦徵爲給事中太祖賜宋
濂黃馬復爲歌命侍臣屬和佐立成性不樂樞要將告歸時
告者多獲重譴或尼之曰君少忍獨不虞性命邪佐乃遲徊
二年卒乞骸歸介字伯貞番禺人博通六籍及釋老書氣豪
邁父母歿遂無仕進意行以囊自隨遇景賦詩投其中日往
來西樵泉石間有司累薦皆辭免洪武二十二年坐累逮赴

京卒於南昌舟次四子潔約粹經皆善詩文工篆隸約隱居
不出有父風純仕御史德宗初爲番禺人洪武三年以明經
薦授洛陽典史歷南陽西安二府幕官竝能其職以年衰乞
改漢陽教諭秩滿調義寧義寧在粵西荒陋甚德爲振舉文
教漸興解官歸卒德初好爲詩晚究洛閩之學謂誠意爲古
聖詰心要故嶺南人稱理學必曰李仲修云哲亦番禺人歷
仕州郡以治行稱

王蒙字叔明湖州人趙孟頫之甥也敏於文不尚槩度工畫
山水兼善人物少時賦官詞仁和俞友仁見之曰此唐人佳
句也遂以妹妻焉元末官理問遇亂隱居黃鶴山自稱黃鶴
山樵洪武初知泰安州事蒙嘗與會稽郭傳僧知聰觀畫胡

惟庸第旣惟庸案內知聰供及此事被逮卒於獄郭傳一名
正傳字文遠初爲僧洪武八年帝謂學士宋濂曰人才不可
一槩而論或有賢能隱於老佛卜筮者對曰昨有僧名傳者
其學有淵源其文雄贍新麗其議論根據六經異才也旣而
濂持其文以進帝召見於謹身殿授翰林應奉直起居注遷
兵部主事署考功監令再遷監丞出署湖廣布政司參政

明史彙

列傳第一百六十二

光祿大夫

經筵講官明史總裁戶部尚書加七級

臣王鴻緒奉

敕編撰

文苑二

林鴻

王 偁等

高棟

王紱

夏 杲

沈度

弟 粲

聶大年

湯胤勳

陳 第

劉溥

蘇 平等

張弼

張泰

陸 銜

程敏政

羅玘

儲巵

楊循吉

桑 悅 戴冠

祝允明

唐寅

李夢陽

康 海 王維禎

王九思

何景明

徐禎卿

邊貢

顧璘

弟 琛 陳 沂

王韋
宋應登

鄭善夫

慶雲霄方豪

王廷陳

李濂

楊愼

林鴻字子羽福清人洪武初以人才薦授將樂縣訓導歷禮部精膳司員外郎太祖臨軒試龍池春曉孤雁二詩稱旨性脫落不善仕年未四十自免歸閩中善詩者稱十才子鴻爲之冠十才子者閩鄭定侯官王褒唐秦長樂高棟王恭陳亮永福王偁及鴻弟子周元黃元時人目爲二元者也鴻之論詩大指謂漢魏骨氣雖雄而菁華不足晉祖元虛宋尙條囑齊梁以下但務春華少秋實惟唐作者可謂大成然貞觀尙習故陋神龍漸變常調開元天寶間聲律大備學者當以是爲楷式閩人言詩者率本於鴻晉府引禮舍人浦源字長源

無錫人也慕鴻名踰嶺訪之遊其門二元請誦所作曰吾家
詩也以告鴻鴻遂往之入社邱定字孟宣嘗爲陳友定記室
友定敗浮海亡交廣人入之還居長樂洪武中徵授延平府
訓導歷齊府紀善國子助教王褒字中美鴻之兄子壻也爲
長沙孝官遷永豐知縣英中召入與修大典擢漢府紀善
唐泰字亨仲洪武二十七年進士除行人歷陝西副使王恭
字安中隱居七巖山自稱皆山樵者永樂初以儒士薦起待
詔翰林年六十餘預修大典書成授翰林院典籍陳亮字景
明自以故元儒生明興累詔不出作陳搏傳以見志結草屋
滄洲中與三山耆彥爲九老會終其身不仕王偁字孟敷父
翰仕元抗節死偁方九歲父友吳海撫教之洪武中領鄉薦

入國學陳情養母母歿廬墓六年永樂初用薦授翰林檢討
與修大典學博才雄最爲解縉所重自負無輩行獨推讓同
官王洪王洪者字希範錢塘人八歲能文十八成進士授吏
科給事中改翰林檢討偕偁等與修大典歷修撰侍講帝頒
佛曲於塞外命洪爲文逡巡不應詔爲同列所排不復進用
卒官而偁後坐累謫交趾復以縉事連及繫死獄中黃元字
元之將樂人聞鴻棄官歸遂攜妻子居閩縣以歲貢官泉州
訓導周元字微之閩縣人永樂中以文學徵拜禮部員外郎
嘗挾書千卷止高棟家讀十年辭去盡棄其書曰在吾腹笥
矣同時趙迪林敏陳仲宏鄭關林伯璟張友謙亦以能詩名
皆鴻之弟子

高棟字彥恢長樂人永樂初自布衣召入翰林爲待詔更名
廷禮別號漫士久之遷典籍性善飲喜談諱工書畫尤專於
詩嘗采唐人所作以體類從依世次定品目曰唐詩品彙九
十卷拾遺十卷又擇其尤合格者爲唐詩正聲十二卷論者
謂其所采擇嚴於音節疎於神理然棟之言曰余夙耽詩恒
欲窺唐人之籓籬首踵其域如墮終南萬壘間茫然不知其
所往然後左攀右陟晨躋夕覽下上登頓進退周旋歷數十
年厥中僻蹊通莊高門邃室歷歷可指數蓋其學之專如是
終明之世館閣宗之

王紱字孟端無錫人博學工歌詩能書寫山水竹石妙絕一
時洪武中坐累戍朔州永樂初用薦以善書供事文淵閣久

之除中書舍人紱未仕時與吳人韓奕爲友隱居九龍山遂自號九龍山人於書法動以古人自期畫不苟作游覽之頃酒酣握筆長廊素壁淋漓霑灑有投金帛購片楮者輒拂袖起或閉門不納甚至詆厲勿顧也人有諫之者紱曰丈夫宜審所處輕者如此重者將何以哉在京師月下聞吹簫聲乘興寫竹石圖明旦訪其人贈之則估客也客以紅羅瑜餽請再寫一枝爲配紱笑曰我爲簫聲訪汝以簫材報汝汝俗子也索前畫裂之還其餽一日退朝黔國公沐晟從後呼其字紱不應同列語之曰此黔國公也紱曰我非不聞之是必與我索畫耳晟走及之果以畫請紱頷之而已踰數年晟復以書來紱始爲作畫旣而曰我畫直遺黔公不可黔公客平仲

微者我友也以友故與之俟黔公與求則可耳其高介絕俗如此崑山夏景者亦善畫竹石亞於紱畫竹一枝直白金一錠然人多以餽遺得之景字仲昭永樂十三年進士改庶吉士尋除中書舍人轉吏部考功主事出知瑞州府擢太常少卿進本寺卿景與上元張益同中進士同以文名同善畫竹其後景見益石渠閣賦自謂不如遂不復作賦益見景所畫竹石亦遂不復畫竹益死土木之難仲微名顯錢塘人嘗知滕縣事謫戍雲南其爲詩頗豪放自喜雲南詩人稱平居陳郭顯其一也

沈度字民則弟粲字民望松江華亭人兄弟皆善書度以婉麗勝粲以道逸勝度博涉經史爲文章絕去浮靡洪武中舉

文學弗就坐累謫雲南岷王具禮幣聘之數進諫未幾辭去都督瞿能與偕入京師成祖初卽位詔部簡能書者入翰林給廩祿度與吳縣滕用亨長樂陳登同與選是時解縉胡廣梁潛王璉皆工書度至最爲帝所賞名出朝士右日侍便殿凡金版玉冊用之朝廷藏祕府頒屬國必命之書遂由翰林典籍擢檢討歷修撰遷侍講學士彙自翰林待詔遷中書舍人擢侍讀進階大理少卿兄弟並賜織金衣鏤姓名於象簡泥之以金贈父母如其官馳驛傳歸告於墓崑山夏昺者字孟暘與其弟景以善書畫聞同官中書舍人時號大小中書而度彙號大小學士度性敦實謙以下人嚴取與有訓導介其友求書請識姓字於上度沈思曰得非曩許奏有司者耶

遽却之其友固請終不肯書姓名其在內廷備顧問必以正對蔡篤於事兄已有賜輒歸其兄度子藻官中書舍人用亨初名權字用衡精篆隸書被薦時年七十矣召見大書麟鳳龜龍四字以進又獻貞符詩三篇授翰林待詔與修永樂大典用亨善鑒古嘗侍帝觀畫卷未竟衆目爲趙伯駒用亨曰此王詵筆也至卷尾果然登字思孝初仕羅田縣丞改蘭谿再改浮梁遷入翰林仍給縣丞祿歷十年始授中書舍人登之入也用亨自詡篆籀謂天下無踰之者且恃年高數面折登登勿與校至三日猶不已登從容進曰登幸在此願有所質乃就用亨言戾於說文者十數事援許氏說證之用亨乃屈服登於六書本原博考詳究用力甚勤自周秦以來殘碑

斷碣必窮搜摩搨審度而辨定之得其傳者太常卿南城程南雲也

聶大年字壽卿臨川人父同文洪武中官翰林侍書中書舍人燕王入京師迎謁道暘死死後五月而大年生母胡撫之比長博學善詩古文葉盛稱其詩謂三十年來絕唱也書得歐陽率更法宣德末薦授仁和訓導母卒歸葬哀感行路里人列其母子賢行上之有司詔旌其門服闋分教常州遷仁

和教諭景泰六年薦入翰林未幾得疾卒始尚書王直以詩寄錢塘戴文進索畫自序昔與文進交嘗戲作詩一聯至是十年始成之大年題其後曰公愛文進之畫十年不忘使以是心待天下賢者天下寧復有遺賢哉直聞其言不怒亦不

薦及大年疾篤作詩貽直有鏡中白髮孰憐我湖上青山欲待誰句直曰此欲吾志其墓耳遂爲之志

湯肩勳字公讓東甄王和曾孫也讀書過目成誦好談天下事與人語不合輒罵辱或拳搏之游江陰見民惡其令率少年上聽事反縛之狀其罪於上官上官大駭并收下獄數歲赦還巡撫周忱送補應天諸生甫七日忤京尹爲所笞走出學門題詩扉上遂棄諸生游江湖間景泰初詔求將才忱以肩勳應召入都試於兵部尚書于謙咨以古今將略及諸史中事應答無爽謙大稱異言於朝授錦衣百戶會方擇人使瓦刺卽擢千戶副楊善趙榮偕行旣抵可汗脫脫不花所問中朝事榮語稍遲肩勳掀髯對甚悉時箕踞岸幘以示無懼

歸二年尚書胡濙等應詔舉將材擢忠義前衛署指揮僉事時瓦剌已講好塞上久息兵諸將又忌肩勦材不令治事鬱鬱無所見乃放意詩酒日與劉溥王淮輩唱和爲樂天順中錦衣偵事者撫肩勦舊過以聞下詔獄洛職爲民荷杖出都門故人唁之仰天大笑曰子以一指揮爲足榮湯生耶掉頭去不顧憲宗立復故官成化三年以薦擢署都指揮僉事爲延綏東路右參將分守孤山堡孤山最當寇衝又無城郭寇歲數入守將黜謫相踵肩勦奉詔歎曰噫吾死矣旣至草奏數千言請築城聚糧增壯士戍守未報寇大至肩勦方病力疾上馬率指揮趙昊等禦之陷伏死昊走還事聞贈祭如制明世武將能文者郭登俞大猷戚繼光之屬以功名顯而肩

勩以詩著萬曆中連江陳第字季立爲諸生用譚綸薦起家
京營裨將出守古北口歷薊鎮游擊將軍善詩深於經學其
著述爲尤富云

劉溥字原博長洲人祖彥父士賓皆以醫得官溥八歲賦溝
水詩時目爲聖童長侍祖父游兩京研究經史兼通天文曆
數宣德時以文學徵有言其善醫者授惠民局副使正統末
京師牛產子五足一生於項蹄上出溥占之曰此小人在上
四裔侵陵象也尋有土木之變用久次調太醫院吏目恥以
醫自名日吟詠爲事其詩初學西崑後更奇縱與湯肩勩蘇
平蘇正沈愚王淮晏鐸鄒亮蔣忠王貞慶號景泰十才子溥
爲主盟肩勩尤自豪然遇溥輒服平字秉衡弟正字秉貞海

寧人兄弟並以布衣終愚字通理崑山人業醫終其身淮字
柏源慈谿人長身美髯嘗與盾勦遇於湖州慈感寺徵青陵
臺事各得其二淮掀髯曰君止是乎復舉其一歷歷口誦無
所遺盾勦大歎服鐸字振之富順人由庶吉士授御史歷按
兩畿山東所至有聲坐言事謫上高典史鄰境寇發官兵不
能討鐸捕滅之歸所掠於民亮字克明長洲人用况鍾薦擢
吏部司務遷御史忠字主忠儀真人徙居句容貞慶字善甫
駙馬都尉寧子也折節好士有詩名時稱金粟公子

張弼字汝弼別號東海松江華亭人成化二年進士授兵部
主事進員外郎遷南安知府地當兩廣衝奸人聚山谷爲惡
悉捕滅之毀淫祠百數十區建爲社學謝病歸士民爲立祠

弱自幼穎拔善詩文工草書怪偉跌宕震撼一世張東海之名流播外裔爲詩信手縱筆多不屬稿卽有所屬以書故輒爲人持去與李東陽謝鐸善嘗自言吾平生書不如詩詩不如文東陽戲之曰英雄欺人每如此不足信也鐸稱其好學不倦詩文成一家言子弘至自有傳

張泰字亨父太倉人陸鉞字鼎儀崑山人陸容字文量亦太倉人三人少齊名號婁東三鳳泰舉天順八年進士選庶吉士授檢討遷修撰爲人恬淡自守詩名亞李東陽弘治間藝苑皆推李懷麓張滄洲東陽有懷麓堂集泰有滄洲集也鉞與泰同年進士殿試第二授編修歷修撰諭德孝宗立以東宮講讀勞進太常少卿兼侍讀得疾歸泰鉞皆早卒兩人詩

東陽嘗稱之而惜其天不假以年也容成化中進士授南京主事進兵部職方郎中西番進獅子奏請大臣往迎容諫止之遷浙江參政罷歸

程敏政字克勤十歲侍父信官四川巡撫羅綺以神童薦英宗召試悅之詔讀書翰林院給廩饌學士李賢彭時呂原中允劉珝咸愛重之賢以女妻焉成化二年進士及第授編修歷左諭德直講東宮翰林中學問該博稱敏政文章古雅稱李東陽性行真純稱陳音各爲一時冠孝宗嗣位以宮僚恩擢少詹事兼侍講學士直經筵敏政名臣子才高負文學常俯視儕偶頗爲人所疾弘治元年冬御史王嵩等以雨災劾敏政因勒致仕五年起官尋遷太常卿兼侍讀學士掌院事

進禮部右侍郎專典內閣誥敕十二年與李東陽主會試舉人徐經唐寅預作文與試題合給事中華杲劾敏政鬻題時榜未放詔敏政毋閱卷其所錄者令東陽會同考官覆校二人卷皆不在所取中東陽以聞言者猶不已敏政杲經寅俱下獄坐經嘗贊見敏政寅嘗從敏政乞文黜爲吏敏政勒致仕而杲以言事不實調南太僕主簿敏政出獄四日憤恚發癰卒後贈禮部尚書或言敏政之獄傅瀚欲奪其位令杲奏之事祕莫能明也

羅玘字景鳴南城人博學好古文務爲奇奧年四十困諸生輸粟入國學丘濬爲祭酒議南人不得留北監玘固請受扑猶不已濬詈之曰若識幾字崛彊乃爾玘仰對曰惟中祕書

未讀耳濬姑留之他日試以文乃大驚異成化末領京闈鄉試第一明年舉進士選庶吉士授編修益肆力古文每有作或據高樹或閉坐一室瞑目隱度形容灰槁自此文益奇玘亦厚自負尤尚節義專諫救劉遜盡下獄玘言當優容以全國體中官李廣死遺一籍具識大臣賄交者帝怒命言官指名劾奏玘上言曰大臣表正百僚今若此固宜寘重典然天下及四裔皆仰望之一旦指名暴其惡啓遠人慢朝廷心言官未見籍記憑臆而論安辨玉石一經攻摘日玷終身臣請降敕密諭使引疾退或斥以他事庶不爲朝廷羞而仕路亦清南京科道楊廉洪遠等交章劾玘妄言亂聽且言尚書屠瀟白昂必不可不去帝不問其後以天變黜大臣竟如玘言

秩滿進侍讀李夢陽下獄玘言壽寧侯託肺腑當有以保全之夢陽不保爲侯累帝深納焉正德初遷南京太常少卿劉瑾亂政李東陽依違其間玘東陽所舉士也貽書責以大義且請削門生之籍尋進本寺卿擢南京吏部右侍郎遇事嚴謹僚屬畏憚畿輔盜縱橫而皇儲未建玘疏論激切且侵執政者七年冬考績赴都遂引疾致仕歸寧王宸濠慕其名遣使餽玘避之深山及叛玘已病馳書守臣約討賊事未舉而卒嘉靖初賜諡文肅學者稱圭峰先生

儲懽字靜夫泰州人九歲能屬文母疾剗股療之卒不起家貧力營墓域日哭冢夜讀書不輟成化十九年鄉試明年會試皆第一授南京吏部考功主事孝宗嗣位疏薦前直諫賤

謫者主事張吉王純中書舍人丁繼華士華文祥吉等皆錄
用久之進郎中吏部尚書耿裕知其賢調北部考注臧否一
出至公嘗覈實一官裕欲改其評囁正色曰公所執何異王
介甫羣僚咸在側裕大慚徐曰郎中言是然非我莫能容也
擢太僕少卿請命史官記注言動如古左右史時不能用進
本寺卿武宗立塞上有警條禦邊五事又陳馬政病民者四
事多議行正德二年改左僉都御史總督南京糧儲召爲戶
部右侍郎尋轉左督倉場所至宿弊盡釐劉瑾用事數凌侮
大臣獨敬囁稱爲先生囁憤其所爲五年春引疾求去詔許
乘傳有司俟疾痊以聞其秋瑾敗以故官召辭不赴後起南
京戶部左侍郎就改吏部卒官囁體貌清羸若不勝衣淳行

詩修介然自守工詩文好推引知名士辟遠非類不惡而嚴
進士顧璘嘗謁尙書邵寶寶語曰子立身當以柴墟爲法柴
墟者壻別號也嘉靖初賜諡文懿

楊循吉字君謙吳縣人成化二十年進士授禮部主事善病
好讀書每得意手足踔掉不能自禁也用是得顛主事名一
歲中數移病不出弘治初請致仕歸年纔三十有一結廬支
礪山下課讀經史旁通內典裨官性狷隘好以學問窮人至
頰赤不顧清寧官災詔求直言馳疏請復建文帝尊號格不
行父母旣歿傾貲治墳寢舌墳側武宗駐蹕南都用伶人薦
名賦打虎曲稱旨易武人裝日侍御前爲樂府小令帝以優
俳畜之不授官循吉以爲恥閏九月辭歸旣復召至京會帝

崩乃還嘉靖中獻九廟頌及華陽求嗣齋儀報聞而已晚歲
落寞益堅癖自好尙書顧璘道吳訪之促膝論文歡甚俄郡
守邀璘璘將赴之循吉忽色變曰楚人敢與貴人爭客耶明
日璘往謝閉門不納卒年八十九其詩文雜集幾及千卷而
俚近者居多時同郡有桑悅戴冠悅字民懌常熟人書過目
輒焚棄曰已在吾腹中矣敢爲大言以孟子自況其生平可
笑類此舉成化元年鄉試授泰和訓導學士丘濬召觀所爲
文給曰出某集悅笑曰公謂悅不怯穢耶乃以若文令悅觀
濬內慚不忤也濬屬學使者善遇之尋遷長沙判調柳州會
艱歸遂不出居家益狂誕鄉人莫不駭之冠字章甫長洲人
篤學嗜古自經史外方術自家莫不綜貫名籍籍諸生間弘

治初歲貢授紹興訓導罷歸二人詩文名亞於循吉

視允明字希哲長洲人祖顯正統四年進士內侍傳旨試能文者四人顯與焉入掖門知欲令教小內豎也不試而出由給事中歷山西參政並有聲允明以弘治五年舉於鄉久之不第授廣東興寧知縣捕戮盜魁三十餘邑以無警稍遷應天通判謝病歸嘉靖五年卒允明生而枝指故自號枝山又號枝指生五歲作徑尺字九歲能詩稍長博覽羣籍文章有奇氣當筵疾書思若湧泉尤工書法名動海內好酒色六博善新聲求文及書者踵至多賄妓掩得之惡禮法士亦不問生產有所入輒召客豪飲費盡乃已或分與持去不留一錢窘乏時黠者或持少銀米可文若書輒應之已少饒更自貴

也晚益困每出追呼索逋者相隨於後允明益自喜所著有詩文集六十卷他雜著百餘卷子續正德中進士仕至廣西左布政使

唐寅字伯虎一字子畏吳縣人性穎利與里狂生張靈縱酒不事諸生業祝允明規之乃閉戶浹歲舉弘治十一年鄉試第一座主梁儲奇其文還朝示學士程敏政敏政亦奇之未幾敏政總裁會試江陰富人徐經賄其家僮得試題事露寅友人都穆構其事言者劾敏政語連寅下詔獄謫爲吏寅恥不就歸家益放浪後緣小故去其妻家無僭石客座嘗滿自署其章曰江南第一風流才子寧王宸濠厚幣聘之寅察其有異志佯狂使酒露其醜穢宸濠不能堪放還築室桃花塢

與客日般飲其中年五十四而卒寅詩文初尙才情晚年頽然自放謂後人知我不在此論者傷之穆字元敬吳縣人弘治十二年進士官至太僕少卿里人娶婦夜雨滅燭徧乞火不得或言南濠都少卿家有讀書燈往叩果然其老而好學如此以陷寅爲世所薄云

李夢陽字獻吉慶陽人父正官周王府教授徙居開封母夢日墮懷而生故名夢陽弘治六年舉陝西鄉試第一明年成進士授戶部主事晉郎中權關格勢要搆下獄得釋十八年應詔上書陳二病二害六漸凡五千餘言極論得失語繁不載末言壽寧侯張鶴齡招納無妄罔利賊民勢如翼虎鶴齡奏辨摘疏中陛下厚張氏語誣夢陽訕母后爲張氏罪當斬

時皇后有寵后母金夫人泣懇帝帝不得已繫夢陽錦衣獄
尋宥出奪俸金夫人懇不已帝弗聽召鶴齡閒處切責之鶴
齡免冠叩頭乃已左右知帝護夢陽請母重罪而子杖以洩
金夫人憤帝又弗許謂尙書劉大夏曰若輩欲以杖斃夢陽
耳吾寧殺直臣快左右心乎他日夢陽途遇壽寧侯詈之擊
以馬箠墮二齒壽寧侯不敢校也孝宗崩武宗立劉瑾等八
虎用事尙書韓文與其僚語及而泣夢陽進曰公大臣何泣
也文曰柰何曰比言官劾羣奄閣臣持其章甚力公誠率諸
大臣伏闕爭閣臣必應之去若輩易耳文曰善君爲我屬草
草成入奏會語洩文等皆逐去瑾深憾之矯旨謫山西布政
司經歷勒致仕旣而瑾復撫他事下夢陽獄將殺之康海爲

說瑾乃免瑾誅起故官遷江西提學副使令甲副使屬總督
夢陽不肯屬也總督陳金惡之監司五日會揖巡按御史夢
陽又不往揖且敕諸生毋謁上官卽謁長揖毋跪御史江萬
實亦惡夢陽淮王府校與諸生爭夢陽笞校王怒奏之未下
御史萬實亦督責諸生夢陽手銀鐺率諸生往鎖之萬實走
免而淮王奏適下御史按治夢陽恐萬實右王訐萬實詔下
總督金行勘金檄布政使鄭岳勘之夢陽僞撰萬實劾金疏
以激怒金并搆岳子云通賄事寧王宸濠者浮慕夢陽嘗請
撰陽春書院記又惡岳乃助夢陽劾岳囚掠云吉安知府劉
喬爲夢陽所挫辱求夢陽短及僞爲奏草事白萬實令奏之
萬實上奏卽謝病去夢陽又與參政吳廷舉有隙廷舉亦上

疏論其侵官不俟命徑去事復下金金奏曰臣不敢復勘夢陽詔遣大理卿燕忠往鞠召夢陽羈廣信獄諸生萬餘爲訟冤不聽劾夢陽凌轢同列挾制上官遂以冠帶閒住去亦褫岳喬職戍沅奪廷舉俸夢陽旣家居益跣弛負氣治園池招賓客日縱俠少射獵繁臺晉丘閒自號空同子海內慕其名趨謁夢陽往往不爲禮宸濠反誅御史周宣劾夢陽黨逆被逮大學士楊廷和尚書林俊力救之坐前作書院記削籍頃之卒子枝進士夢陽才思雄鷲卓然以復古自命弘治時宰相李東陽主文柄天下翕然宗之夢陽獨譏其萎弱倡言文必秦漢詩必盛唐非是者弗道與何景明徐禎卿邊貢朱應登顧璘陳沂鄭善夫康海王九思等號十才子又與景明禎

卿貢海九思王廷相號七才子皆卑視一世而夢陽尤甚吳人黃省曾越人周祚千里致書願爲弟子迨嘉靖朝李攀龍王世貞出復奉以爲宗天下推李何王李爲四大家無不爭效其體華州王維楨以爲七言律自杜甫以後善用頓挫倒插之法惟夢陽一人而後有譏夢陽詩文者則謂其模擬剽竊得史遷少陵之似而失其真云海字德涵武功人弘治十五年殿試第一授修撰與夢陽輩相倡和訾議諸先達忌者頗衆正德初劉瑾亂政以海同鄉慕其才欲招致之海不肯往會夢陽下獄書片紙招海曰對山救我對山者海別號也海乃謁瑾瑾大喜爲倒屣迎海因設詭辭說之瑾意解明日釋夢陽海自是與瑾往還踰年瑾敗海坐黨落職九思字敬

夫鄆人弘治九年進士由庶吉士授檢討尋調吏部至郎中亦以瑾黨謫壽州同知復被論勒致仕海九思同里同官同以瑾黨廢每相聚汧東鄆杜間挾聲伎酣飲製樂造歌曲自比俳優以寄其怫鬱九思嘗費重貲購樂工學琵琶海搗彈尤善後人傳相倣效大雅之道微矣維植字允寧嘉靖十四年進士擢庶吉士累官南京國子祭酒家居地大震壓死維植頥而背自負經世才職文墨不得少效於世每好酒謾罵人多畏而遠之於文好司馬遷於詩好杜甫而其意以夢陽兼此二人終身所服膺效法者夢陽也

何景明字仲默信陽人八歲能詩古文弘治十一年舉於鄉年方十五宗藩貴人爭遣人負視所至聚觀者堵十五年

進士授中書舍人與李夢陽輩倡古詩文夢陽最雄駿景明
稍後出相與頡頏正德改元劉瑾竊柄上書吏部尚書許進
勸其秉政毋撓語極激烈已遂謝病歸踰年瑾盡免諸在告
者官景明坐罷瑾誅用李東陽薦起故秩直內閣制敕房李
夢陽下獄衆莫敢爲直景明上書吏部尚書楊一清救之九
年乾清宮災疏言義子不當蓄邊軍不當留番僧不當寵宦
官不當任留中久之進吏部員外郎直制敕如故錢寧欲交
驩以古畫索題景明曰此名筆毋汚人手留經年終擲還之
尋擢陝西提學副使廖鵬弟太監鑾鎮關中橫甚諸參隨遇
三司不下馬景明執撻之其教諸生專以經術世務逢秀者
於正學書院親爲說經不用講家訓詰士始知有經學嘉靖

初引疾歸未幾卒年三十有九景明志操耿介尚節義鄙榮利與夢陽並有國士風兩人爲詩文初相得甚歡名成之後互相詆譏夢陽主摹倣景明則主剏造各樹堅壘不相下兩人交游亦遂分左右袒說者謂景明之才本遜夢陽而其詩秀逸穩稱視夢陽麤浮剽竊反爲過之然天下語詩文必並稱何李又與邊貢徐禎卿並稱四傑其持論謂詩溺於陶謝力振之古詩之法亾於謝文靡於隋韓力振之古文之法亾於韓頗爲時所議

徐禎卿字昌穀吳縣人資穎特家不蓄一書而無所不通自爲諸生已工詩歌與里人唐寅善寅言之沈周楊循吉山是知名舉弘治十八年進士孝宗遣中使問禎卿與華亭陸深

名深遂得館選而禎卿以親寢不與授大理左寺副坐失囚
貶國子博士禎卿少與祝允明唐寅文徵明齊名號吳中四
才子其爲詩喜白居易劉禹錫旣登第與李夢陽何景明游
悔其少作改而趨漢魏盛唐然故習猶在夢陽譏其守而未
化卒年二十有三禎卿體癯神清詩鋒鍊精警爲吳中詩人
之冠年雖不永名滿士林子伯虬舉人亦能詩

邊貢字廷實歷城人祖寧應天治中父節代州知州貢年二
十舉於鄉第弘治九年進士除太常博士擢兵科給事中孝
宗崩疏劾中官張瑜太醫劉文泰高廷和用藥之謬又劾中
官苗達保國公朱暉都御史史琳用兵之失改太常丞遷衛
輝知府改荊州並能其官歷陝西河南提學副使以母憂家

居嘉靖改元用薦起南京太常少卿三遷太常卿督四夷館擢刑部右侍郎拜戶部尚書並在南京貢早負才名美風姿所交悉海內名士久官留都優閒無事游覽江山揮毫浮白夜以繼日都御史劾其縱酒廢職遂罷歸生平好蓄書積至數萬卷一夕火幾盡仰天大哭曰天喪我也遂發病卒

顧璘字華玉上元人弘治九年進士授廣平知縣擢南京吏部主事晉郎中正德四年出爲開封知府數與鎮守大監廖堂王宏忤逮下錦衣獄謫全州知州秩滿遷台州知府歷浙江左布政使山西湖廣巡撫右副都御史所至有聲遷吏部右侍郎改工部董顯陵工畢遷南京刑部尚書罷歸年七十餘卒璘少負才名與何李相上下虛已好士如恐不及在浙

慕孫太初一元不可得見道衣幅巾放舟湖上月下見小舟泊斷橋一僧一鶴一童子煮茗笑曰此必太初也移舟就之遂往還無間撫湖廣時愛王廷陳才欲見之廷陳不可偵廷陳狎游疾掩之廷陳避不得遂定交既歸構息園大治幸舍居客客常滿從弟璵字英玉以河南副使歸家居園側一小樓教授自給璘時時與客豪飲伎樂雜作呼璵璵終不赴其孤介如此初璘與同里陳沂王韋號金陵三俊其後寶應朱應登繼起稱四大家璘詩矩矱唐人以風調勝韋婉麗多致頗失纖弱沂與韋同調應登才思泉湧落筆千言然璘應登羽翼李夢陽而韋沂則頗持異論三人者仕宦皆不及璘沂字魯南正德中進士由庶吉士歷編修侍講出爲江西參議

量移山東參政因不附張孚敬桂萼改行太僕卿致仕韋宇
欽佩父嶽成化時給事中直諫有聲韋舉弘治中進士由庶
吉士歷官太僕少卿子達元亦能詩應登字升之弘治中進
士歷雲南提學副使遷參政恃才傲物中飛語罷歸子曰藩
嘉靖間進士終九江知府能文章世其家南都自洪永初風
雅未暢徐霖陳鏐金琮謝璿輩談藝正德時稍稍振起自麟
至詞壇士大夫希風附塵厥道大彰許穀陳鳳璿子少南金
大車大輿金鑾盛時秦陳芹之屬並從之游穀等皆里人鑾
僑居客也儀真蔣山卿江都趙鶴亦與璿遙相應和浴及未
造風流未歇云

鄭善夫字繼之閩縣人弘治十八年進士連遭內外艱正德

六年始爲戶部主事。擢稅許墅以清操聞。時劉瑾雖誅，嬖倖用事，善夫憤之，乃偕歸築草堂金鼇峰下，爲遲清亭讀書。其中曰：俟天下之清也。巖居六載，寡交游，日晏未炊，欣然自得。起禮部主事，遷員外郎。武宗南巡，偕同列切諫，杖於廷，罰跪五日。善夫更爲疏，草置懷中。屬其僕曰：死卽上之，幸不死。歎曰：時事若此，尙可。醜顏就戮，歸未得明年力，請乃得歸。嘉靖改元，用薦起南京刑部郎中。未上，改吏部，行抵建寧，便道游武夷九曲，風雪絕糧，得病卒。年三十有九。善夫敦行，誼婚嫁，七弟妹，貲悉推予之。葬母黨二十二人，所交盡名士。與孫一元、殷雲霄、方豪尤友善，作詩力摹少陵，疾時汙多，悲憤語雲霄字近夫、壽張人善夫。同年進士作蓄艾堂聚書。

數千卷以作者自命正德中官南京給事中武宗納有娠女子馬姬宮中雲霄偕同官疏諫引李園呂不韋事爲諷不報卒官年三十有七鄉人穆孔暉畏雲霄峭直曰殷子恥不善不啻負穢然豪字思道開化人正德三年進士除崑山知縣遷刑部主事諫武宗南巡跪闕下五日復受杖歷官湖廣副使罷歸一元見隱逸傳閩中詩文自林鴻高棟後閱百餘年善夫繼之風雅復振焉

王廷陳字穉欽黃岡人父濟吏部郎中廷陳穎慧絕人幼好弄父扶之輒大呼曰大人柰何虐天下名士正德十二年成進士選庶吉士益恃才放恣故事兩學士爲館師體嚴重廷陳伺其退食獨上樹杪大聲叫呼兩學士無如之何佯弗聞

也武宗下詔南巡真同館舒芬等七人將疏諫館師石瑋力止之廷陳賦烏母謠大書於壁以刺瑋及執政皆不悅已而疏上帝怒罰跪五日杖於廷時已改吏科給事中乃出爲裕州知州廷陳不習爲吏又失職怨望簿牒堆案漫不省視夏日裸跣坐堂皇見飛鳥集庭樹輒止訟者取彈彈之民有罪當杖令輸彈丸二十卽免居恒無所發憤遇囚榜掠過當上官行部不出迎曰是皆盲子足當王生迎耶已而布政使陳鳳梧及巡按御史喻茂堅先後至廷陳以鳳梧座主特出迓鳳梧好謂曰子候我固善御史卽來候之當倍謹廷陳許諾及茂堅至銜其素驕蹇有意裁抑之以小過榜州吏廷陳爲跪請茂堅故益甚廷陳大罵曰陳公誤我直上堂搏茂堅悉

呼吏卒出鎖其門禁絕供億且將具奏茂堅大窘鳳梧爲解
乃夜馳去尋上疏劾之適裕人被案者逸出奏廷陳不法事
收捕繫獄削籍歸世宗踐阼前直諫被謫者悉復官獨廷陳
以呈吏議不與屏居二十餘年嗜酒縱倡樂益自放廢士大
夫造謁多蓬髮赤足不具賓主禮時衣紅紫窄袖衫騎牛跨
馬嘯歌田野閒嘉靖十八年詔修承天大志巡撫顧璘以廷
陳及顏木王格薦書成不稱旨賜銀幣而已廷陳才高詩文
重當世一時才士鮮能過之木應山人官亳州知州格京山
人官河南僉事

李濂字川父祥符人舉正德八年鄉試第一明年成進士授
泗陽知州稍遷寧波同知擢山西僉事嘉靖五年以大計免

統三十有八濂少負俊才時從俠少年聯騎出城搏獸
雜酒酣悲歌慨然慕信陵君侯生之爲人一日作理情賦
友人左國璣持以示李夢陽夢陽大嗟賞訪之吹臺濂自此
聲馳河雒間既罷歸益肆力於學遂以古文名於時初受知
夢陽後不屑附和里居四十餘年著述甚富

楊慎字用修新都人少師廷和子也年二十二舉正德六年
殿試第一授翰林修撰丁繼母憂服闋起故官十二年八月
武宗微行始出居庸關慎抗疏切諫尋移疾歸世宗嗣位起
充經筵講官常講舜典言聖人設贖刑乃施於小過俾民自
新若元惡大奸無可贖之理時大鴻臚銳于經論死或言進
金銀獲宥故及之嘉靖三年帝納嬖專張璁言召爲翰林學

士慎偕同列三十六人上言臣等與粵輩學術不同議論亦異臣等所執者程頤朱熹之說也粵等所執者冷衷段猶之餘也今陛下既超擢粵輩不以臣等言爲是臣等不能與同列願賜罷斥帝怒切責停俸有差踰月又偕學士豐熙等疏諫不得命偕廷臣伏左順門力諫帝震怒命執首事八人下詔獄於是慎及檢討王元正撼門大哭衆皆哭聲徹殿庭帝益怒悉下詔獄廷杖之閱十日有言前此朝罷羣臣已散慎元正及給事中劉濟安磐張漢卿張原御史王時柯實糾衆伏哭乃再杖七人於廷慎元正濟並謫戍餘削籍慎得雲南永昌衛先是廷和當國盡斥錦衣冒濫官及是伺諸途將害慎慎知而謹備之至臨清始散去扶病馳萬里德甚巡撫

襄復促之抵戍所幾不起五年聞廷和疾馳至家廷和喜疾愈還永昌聞尋甸安銓武足鳳朝文作亂率僮奴及步卒百餘馳赴木密所與守臣擊敗賊八年聞廷和訃奔告巡撫歐陽重請於朝獲歸葬訖復還自是或歸蜀或居雲南會城或留戍所大吏咸善視之及年七十還蜀巡撫王昺遣四指揮手銀鐺命鎖以來至則昺已去官愼不久亦卒嘉靖三十八年七月也年七十有二愼幼警敏十一歲能詩十二擬作古戰場文過秦論長老驚異入京賦黃葉詩李東陽見而嗟賞令受業門下在翰林時武宗問欽天監及翰林星有注張又作汪張是何星也衆不能對愼曰柳星也歷援周禮史記漢書以復預修武宗實錄事必直書總裁蔣冕費宏盡付藁

草俾削定嘗奉使過鎮江謁楊一清閱所藏書叩以疑義一
清皆成誦慎驚異益肆力古學既投荒多暇書無所不覽嘗
語人曰資性不足恃日新德業當自學問中來故好學窮理
老而彌篤世宗以議禮故惡其父子特甚每問慎作何狀閣
臣以老病對乃稍解慎聞之益縱酒自放嘗以粉傅面作雙
鬢髻插花令衆妓擁之游行城市諸上官慕其名用精白綾
作襪爲諸妓服酒闌乞書諸上官輒購歸裝潢成卷慎聞不
怒也明世記誦之博著作之富推慎爲第一詩文外雜著至
一百餘種並行於世隆慶初贈光祿少卿天啓中追諡文憲

明史藁

列傳第一百六十三

光祿大夫

經筵講官明史總裁戶部尚書加七級

臣

王鴻緒奉

敕編撰

文苑三

文徵明

蔡羽陸師道

黃省曾陳道復

袁袞王穀祥

王寵

年

周天球錢穀

黃佐

歐大任黎民表

柯維騏

王慎中

高叔嗣

蔡汝楠

陳東

李開先

田汝成

皇甫湊

冲瀆

王問

茅坤

謝榛

盧柟

李攀龍

梁有譽徐中行

宗臣吳國倫

王世貞

汪道昆胡應麟

弟世懋

歸有光

胡友信

何良俊

王圻等

徐渭

文徵明長洲人初名璧以字行更字徵仲別號衡山父林溫
州知府叔父森右僉都御史林卒吏民醵千金爲賻徵明年
十六悉却之吏民修故却金亭以配前守何文淵而記其事
徵明幼不慧稍長穎異挺發學文於吳寬學書於李應禎學
畫於沈周皆父友也又與祝允明唐寅徐禎卿輩相切劘名
日益著其爲人和而介寧王宸濠慕其名貽書幣聘之辭病
不赴正德末巡撫李充嗣薦之朝會徵明亦以歲貢生詣都
吏部試而才之奏授翰林院待詔世宗立預修武宗實錄侍
經筵歲時頒賜與諸詞臣齒而是時專尚科目徵明意不自
得連歲乞歸永嘉張璠者林曾知溫州所造士也方得勢或議

徵明附之辭不就楊一清召入輔政徵明見獨後一清亟謂
曰子不知乃翁與我友邪徵明曰先君棄不肖三十餘年苟
以一字及者弗敢忘實不知相公與先君友也一清亦無忤
尋與璉謀欲徙徵明官徵明乞歸益力乃獲致仕四方乞詩
文書畫者接踵於道書生故人子弟有求輒應而富貴人不
易得片楮尤不肖與王府及中人曰此法所禁也周徽諸王
以古寶玩爲贈不啓封而還之外國使者道吳門望里肅拜
以不獲見爲恨文筆徧天下門下士贗作者頗多徵明亦不
禁嘉靖三十八年卒年九十矣長子彭字壽承國子博士次
子嘉字休承和州學正竝能詩工書畫篆刻世其家女嫁王
氏亦能詩彭孫震孟自有傳吳中自吳寬王鏊以文章領袖

館閣一時名士沈周祝允明輩與竝馳騁文風極天下盛徵明及蔡羽黃省曾袁袞皇甫冲兄弟稍後出而徵明主風雅數十年與之游者王寵陸師道陳道復王穀祥彭年周天球錢穀之屬亦皆以詞翰名於世羽字九遠由國子生授南京翰林院孔目居洞庭西山自號林屋山人有林屋南館二集自負甚高文法先秦兩漢或謂其詩似李賀羽曰吾詩求出魏晉上今乃爲李賀邪其不肖屈抑如此省曾字勉之舉鄉試從王守仁湛若水游又學詩於李夢陽嘗馳書夢陽云李杜詩聖而文格未光韓柳文豪而詩道不粹兼之者實惟我公以是阿夢陽夢陽大悅識者哂之省曾所著有五嶽山人集子姬水字淳父學書於祝允明亦有文名袞字永之七歲

能詩奉嘉靖五年進士改庶吉士張璉惡之出爲刑部主事
累遷廣西提學僉事兩廣自韓雍後監司謁督府率庭跪表
獨長揖無何謝病歸子尊尼字魯望亦官山東提學副使有
文名寵字履吉別號雅宜少學於蔡羽居林屋者三年旣而
讀書石湖由諸生貢入國子僅四十而卒行楷得晉法書無
所不觀徵明長寵二十四歲折輩行與交王雅宜之名滿天
下師道字子傳由進士授工部主事改禮部以養母請告歸
歸而游徵明門稱弟子家居十四年乃復起累官尚寶少卿
善詩文工小楷古篆繪事人謂徵明四絕不減趙孟頫而師
道竝傳之其風尚亦略相似平居不妄交游長吏罕識其面
女字卿子適趙宦光夫婦皆有聞於時道復名淳以字行祖

璠副都御史淳受業於徵明以文行著善書畫自號白陽山人穀祥字祿之由進士改庶吉士歷官吏部員外郎忤尚書汪鋮左遷真定通判以歸與師道俱有清望年字孔嘉其人亦長者天球字公瑕穀字叔寶天球以書穀以畫皆繼徵明表表吳中者也

黃佐字才伯香山人祖瑜長樂知縣以學行聞正德中佐舉鄉試第一世宗嗣位始成進士選庶吉士嘉靖初授編修陳初政要務又請修舉新政疏皆留中尋省親歸便道謁王守仁與論知行合一之旨數相辨難守仁亦稱其直諒還朝會出諸翰林爲外僚除江西僉事旋改督廣西學校聞母病引疾乞休不俟報竟去下巡撫林富逮問富言佐誠有罪第爲

親受過於情可原乃令致仕家居九年會簡宮僚命以編修
兼司諫尋進侍讀掌南京翰林院召爲右諭德擢南京國子
祭酒母憂服除起少詹事謁大學士夏言與論河套事不合
會吏部缺左侍郎所司推禮部右侍郎崔桐及佐給事中徐
霈御史艾朴言桐與左侍郎許成名競進至相詬詈而佐及
同官王用賓亦爭覬望惟恐或先之宜皆止勿用言從中主
之遂皆賜罷佐學以程朱爲宗惟理氣之說獨持一論平生
撰述至二百六十餘卷所著樂典自謂洩造化之祕年七十
七卒穆宗詔贈禮部右侍郎謚文裕佐弟子多以行業自飭
而梁有譽歐大任黎民表詩名最著云大任字楨伯順德人
由歲貢生歷官南京工部郎中年八十而終民表字惟敬從

化人御史貫子也舉鄉試久不第授翰林孔目遷吏部司務
執政知其能文用爲制敕房中書供事內閣加官至參議

柯維騏字奇純莆田人高祖潛翰林學士父英徽州知府維
騏舉嘉靖二年進士授南京戶部主事未赴輒引疾歸張孚
敬用事勅新制京朝官病滿三年者概罷免維騏亦在罷中
自是謝賓客專志讀書久之門人日進先後四百餘人維騏
引掖靡倦慨近世學者樂徑易而憚積累竊二氏之說以文
其固陋也作左右二銘訓學者以務實以辨心術端趨向爲
實志以存敬畏密操履爲實功而其極則以宰理人物成能
天地爲實用作講義二卷宋史與遼金二史舊分三書維騏
乃合之爲一以遼金附之而列二王於本紀褒貶去取義例

嚴整閱二十年而始成名之曰宋史新編又著史記考要續
莆陽文獻志及所作詩文集竝行於世維騏登第五十載未
嘗一日服官中更倭亂故廬焚燬家困甚終不妄取世味無
所嗜惟嗜讀書撫按監司時有論薦迄不復起隆慶初廷臣
復薦所司以維騏年高但授承德郎致仕終於萬曆二年年
七十有八孫茂竹海陽知縣茂竹子昶副都御史巡撫山西
王愼中字道思晉江人四歲能誦詩十八舉嘉靖五年進士
授戶部主事尋改禮部祠祭司時四方名士唐順之陳束李
開先趙時春任瀚熊過屠應竣華察陸銓江以達曾忬輩咸
在部曹愼中與之講習學大進十二年詔簡部郎爲翰林衆
首擬愼中大學士張孚敬欲一見辭不赴乃稍移吏部爲考

功員外郎進驗封郎中忌者讒之孚敬因覆議直人張衍慶請封疏謫常州通判稍遷戶部主事禮部員外郎竝在南京久之擢山東提學僉事改江西參議進河南參政侍郎王梟奉命賑荒以其事委愼中還朝薦愼中可重用會二十年大計吏部注愼中不及而大學士夏言先嘗爲禮部尚書愼中其屬吏也與相忤遂內批不謹落其職愼中爲文初主秦漢謂東京下無可取已悟歐曾作文之法乃盡焚舊作一意師倣尤得力於曾鞏順之初不服久亦變而從之壯年廢棄益肆力古文演迤詳贍卓然成家與順之齊名天下稱之曰王唐又曰晉江毘陵家居問業者踵至年五十一而終李攀龍王世貞後起力排之卒不能掩攀龍愼中提學山東時所賞

拔者也。慎中初號遵巖居士，後號南江。應峻字文升，平湖人。刑部尚書勳子也。舉嘉靖五年進士，由郎中改翰林官。至右諭德。察字子潛，無錫人。應峻同年進士，累官侍讀學士。掌南京翰林院銓。字遜之。鄞人。嘉靖二年進士，與弟編修武爭大禮，並繫詔獄。被杖後，官廣西布政使。武終山東提學副使。兄弟皆能文。以達字子順，貴溪人。嘉靖五年進士，累官福建提學僉事。

高叔嗣字子業，祥符人。年十六，作申請賦幾萬言，見者驚異。十八舉於鄉第。嘉靖二年進士，授工部主事。改吏部，歷稽勳郎中。出爲山西左參政，斷疑獄十二事。人稱爲神。遷湖廣按察使。卒。官年三十有七。叔嗣少受知邑人李夢陽及官吏部。

與三原馬理武城王道同署以文藝相磨切其爲詩清新婉約雖爲夢陽所知不宗其說陳東序其蘇門集謂有應物之冲澹兼曲江之沈雄體王孟之清適具高岑之悲壯王世貞則曰子業詩如高山鼓琴沈思忽往木葉盡脫石氣自青又如衛洗馬言愁憔悴婉篤令人心折而蔡汝楠至推爲本朝第一云兄仲嗣官知府亦有才名於世汝楠字子木兒時隨父南京聽祭酒湛若水講學輒有解悟年十八成嘉靖十一年進士授行人從王愼中唐順之及叔嗣輩學爲詩尋進刑部員外郎徙南京刑部善皇甫洵兄弟尚書顧璘引爲忘年交廷議改歸德州爲府擢汝楠知其府事以母憂歸聚諸生石鼓書院與說經治民有惠政旣去士民祠祀之歷官江西

左右布政使擢右副都御史巡撫河南召爲兵部右侍郎從
請大僚祝釐西宮世宗望見其貌寢改南京工部右侍郎未
幾卒汝楠始好爲詩有重名中年好經學及官江西與鄒守
益羅洪先游學益進然詩由此不工云

陳東字約之鄆人生而聰慧絕倫好讀古書會稽侍郎董玘
官翰林時爲愛女擇壻東里人張邦奇爲言東才召視之東
垂髻而前試詞賦立就遂字以女攜至京東遂有文譽嘉靖
八年廷對世宗親擢羅洪先程文德楊名爲一甲而置唐順
之及東任瀚於二甲皆手批其卷無何考庶吉士得胡經等
二十人以東及順之瀚曾奉御批列經等首座主張璉霍韜
以前此館選悉改他曹引嫌亦議改乃寢前命東授禮部主

事時有嘉靖八才子之稱謂東及王慎中唐順之趙時春熊過任瀚李開先呂高也四郊改建都御史汪鋹請徙近郊一二里內居民墳墓東疏諫不報遷員外郎改編修東出聰韜門不肖親附歲時上壽至門投刺輒馳馬過之爲所惡出爲湖廣僉事分巡辰沅治有聲稍遷福建參議改河南提學副使東故有嘔血疾會科試期迫試八郡之士三月而畢疾增劇竟不起年纔三十有二妻董慧甚亦能詩東卒未幾亦卒東竟無後當嘉靖初稱詩者多宗何李東與順之輩厭而矯之東早世且藁多散逸今所傳后岡集僅十之一二云后岡東別號也開先字伯華章丘人東同年進士官至太常少卿性好畜書李氏藏書之名聞天下高字山甫丹徒人亦東同

年進士歷官山東提學副使鄉試錄文舊多出學使者手巡按御史葉經遠乞順之文高心憾寓書京師友人言經紕繆嚴嵩惡經遂置之死及後大計諸御史謂經禍由高乃斥歸於八子中名最下

田汝成字叔禾錢塘人嘉靖五年進士授南京刑部主事尋召改禮部十年十二月上言陛下以青宮久虛祈天建醮復普放生之仁凡羈蹄鍛鬪禁在上林者咸獲縱釋顧使囹圄之徒久纏徽纆衣冠之侶流竄窮荒父子長離魂魄永喪此獨非陛下之赤子乎望大廣皇仁悉加寬宥忤旨切責停俸二月屢遷祠祭郎中廣東僉事謫知滁州復擢貴州僉事改廣西右參議分守右江龍州土酋趙楷憑祥州土酋李寰皆

弑主自立與副使翁萬達密討誅之努灘賊侯公丁爲亂斷
藤峽羣賊與相應汝成復偕萬達設策誘擒公丁而進兵討
峽賊大破之又與萬達建善後七事一方遂靖有銀幣之賜
涖右江數年頻有兵事皆萬達尸謀而汝成贊決之其績甚
著尋遷福建提學副使歲當大比預定諸生甲乙比榜發一
如所定汝成博學工古文尤善敘述歷官西南諳曉先朝遺
事撰炎徼紀聞歸田後盤桓湖山窮游浙西諸名勝撰西湖
游覽志竝見稱於時他所論著甚多時推其博洽子藝衡字
子藝十歲從父過采石賦詩有警句性放誕不羈嗜酒任俠
以歲貢生爲徽州訓導罷歸作詩有才調爲人所稱

皇甫濬字子安長洲人父錄弘治九年進士任重慶知府生

四子冲洵泐濂冲泐同登嘉靖七年鄉薦明年泐第進士又三年洵第進士又十三年濂亦第進士而冲尚爲舉子兄弟竝好學工詩稱皇甫四傑冲字子浚善騎射好談兵遇南北內訌譔幾策兵統枕戈襍言三書凡數十萬言洵初授工部主事改禮部歷儀制員外郎主客郎中在儀制時夏言爲尚書連疏請建儲皆洵起草故言深知洵才比簡宮僚遂用爲春坊司直兼翰林檢討言者論洵改官有私謫廣平通判量移南京刑部主事進員外郎遷浙江僉事大計京官以南曹事論罷邑邑發病卒洵沈靜寡與自負高峻稍不當意終日相對無一言居官砥廉隅然頗操切多忤物故數被讒謗云泐字子循七歲能詩官工部主事名動公卿沾沾自喜用是

貶秩爲黃州推官屢遷南京稽勲郎中再貶開州同知量移處州府同知擢雲南僉事以計典論黜訪和易近聲色好狹游不能通知戶外事於兄弟中最老壽年八十乃卒濂字子約初授工部主事母喪除起故官典惜薪廠賈人僞增數罔利濂杖而按其罪其女乃尚書文明妾明召濂切責之濂抗言曰公掌邦政縱奸人干紀又欲奪郎官法守邪明爲斂容謝大計謫河南布政司理問終興化同知濂兄弟與黃魯曾省曾爲中表兄弟文藻亦相似其後里人張鳳翼燕翼獻翼竝負才名吳人語曰前有四皇後有三張鳳翼燕翼終舉人而獻翼爲太學生名日益高年老矣狂甚爲讐家所殺

王問字子裕無錫人受業同縣邵寶以學行稱嘉靖十七年

歲進士授戶部主事改南京職方以父老便養請也遷車駕
郎中擢廣東按察司僉事行至桐江徘徊不欲去箠得甘節
之卦賦詩十二章遂乞養歸父卒不復仕築室湖濱寶界山
讀書三十年不履城市清修雅尚數薦不起興至則爲詩文
或行草數紙或點染花鳥不矜研削用自娛悅年八十乃卒
子鑑字汝明嘉靖末年進士累官吏部稽勲郎中念父老謝
病歸奉養父歿起尚寶卿改南京鴻臚卿引年乞休進太僕
卿致仕

茅坤字順甫歸安人嘉靖十七年進士歷知青陽丹徒二縣
母憂服闋遷禮部主事移吏部稽勲司坐累謫廣平通判屢
遷廣西兵備僉事轄府江道坤雅好談兵猺賊據鬼子諸若

殺陽朔令朝議大征總督應檜以問坤坤曰大征非兵十萬不可餉稱之今猝不能集而賊已據險爲備矣計莫若鵬勦倭入殲其魁他部必讐謀自全此便計也檜善之悉以兵事委坤連破十七砦晉秩二等民立祠祀之遷大名兵備副使總督楊博歎爲奇才特薦於朝爲忌者所中追論其先任貪污狀落職歸時倭事方急胡宗憲延之幕中與籌兵事奏請爲福建副使吏部持之乃已家人橫於里爲巡按龐尚鵬所劾遂褫冠帶坤旣廢用心計治生家大起年九十卒於萬曆二十九年坤善古文最心折唐順之順之喜唐宋諸大家文所著文編唐宋人白韓柳歐三蘇曾王八家外無所取故坤選八大家文鈔其書甚行海內鄉里小生無不知茅鹿門者

鹿門坤之別號也少子維字孝若能詩與同郡臧懋循吳稼
澄吳夢暘竝稱四子嘗詣闕上書希得名見陳當世大事不
報

謝榛字茂秦臨清人眇一目年十六作樂府商調少年爭歌
之已折節讀書刻意爲歌詩西游彰德爲趙康王所賓禮入
京師脫盧柁於獄李攀龍王世貞輩結詩社榛爲長攀龍次
之及攀龍名大熾榛與論生平頗相鑄責攀龍遂貽書絕交
世貞輩右攀龍力相排擠削其名於七子之列然榛游道日
廣秦晉諸王爭延致大河南北皆稱謝榛先生趙康王卒榛
乃歸萬曆元年冬復游彰德王曾孫穆王亦賓禮之酒闌樂
止命所愛賈姬獨奏琵琶則榛所製竹枝詞也榛方傾聽王

命姬出拜光華射人藉地而坐竟十章榛曰此山人里言安足污佳人玉齒請更製以備房中之奏詰朝上新詞十四闕姬悉按而譜之明年元旦便殿奏伎酒止送客卽盛禮而歸姬於榛榛載以游燕趙間至大名客請賦壽詩百章成八十餘首投筆而逝當七子結社之始尚論有唐諸家茫無所從榛曰取李杜十四家最勝者熟讀之以會神氣歌詠之以求聲調玩味之以裒精華得此三要則浩乎渾淪不必塑謫仙而畫少陵也諸人心師其言厥後雖合力擯榛其稱詩指要實自榛發也

盧柁字少樞濬縣人家素封輸貲爲國學生博聞強記落筆數千言爲人跡弛好使酒罵座常爲具名邑今日晏不至柁

大怒徹席滅炬而臥令至柙已大醉不具賓主禮會柙役夫被榜他口牆壓死令卽捕柙論死繫獄破其家里中兒爲獄卒恨柙笞之數百謀以土囊壓殺之爲他卒救解柙居獄中益讀所攜書作幽鞠放招二賦詞旨沈鬱謝榛攜入京師見諸貴人泣訴其冤狀曰生有一盧柙不能救乃從千古哀沉而弔湘乎平湖陸光祖選得濬令因榛言平反其獄柙出走謁榛榛方客趙康王所王立召見柙禮爲上賓諸宗人以王故爭容柙柙酒酣罵座如故及光祖爲南京禮部郎柙往訪之因徧游吳會無所遇還益落魄嗜酒病三日卒柙騷賦最爲王世貞所稱詩亦豪放如其爲人

李攀龍字于鱗歷城人九歲而孤家貧自奮於學稍長爲諸

生與友人許邦才殷士儵學爲詩歌已益厭訓詁學日讀古書里人共目爲狂生舉嘉靖二十三年進士授刑部主事歷員外郎郎中稍遷順德知府有善政上官交薦擢陝西提學副使鄉人殷學爲巡撫檄令屬文攀龍怫然曰文可檄致邪拒不應會其地數震攀龍心悸念母思歸遂謝病故事外官謝病不再起吏部重其才用何景明例特予告歸予告者例得再起攀龍旣歸構白雪樓東眺華不注西挹鮑山曰他無所溷吾目也名日益高賓客造門牽謝不見大吏至亦然以是得簡傲聲獨故交殷許輩過從靡間時徐中行亦家居坐客恒滿二人聞之交相得也歸田將十年隆慶改元薦起浙江副使改左叅政擢河南按察使攀龍至是摧亢爲和賓客

亦稍稍進無何奔母喪歸哀毀得疾少間一日心痛卒攀
龍之始官刑曹也濮州李先芳臨清謝榛孝豐吳維岳輩方
倡詩社往與焉王世貞初釋褐先芳引入社遂與攀龍定交
明年先芳出爲外吏又二年宗臣梁有譽入是爲五子未幾
徐中行吳國倫亦入乃改稱七子諸人多少年才高氣銳互
相標榜視當世無人七才子之名播天下擯先芳維岳不與
兩人恨次骨已而榛亦被擯攀龍遂爲之魁其持論謂文自
西京詩自天寶而下俱無足觀於本朝獨推李夢陽諸子翕
然和之非是則詆爲宋學攀龍才思勁鷲名最高獨心重世
貞天下亦竝稱王李又與李夢陽何景明竝稱何李王李其
爲詩務以聲調勝然辭意不能無重複所擬樂府至更古數

字爲已作文則擊牙戟口讀者至不能終篇好之者推爲一代宗匠亦多受世挾摘云自號滄溟有譽臣中行國倫皆嘉靖二十九年進士有譽除刑部主事旅食三年蕭然一室以念母告歸杜門讀書大吏至辭不見卒年三十六有譽善相人謂宗臣曰子甚貴而無年已自歎曰吾亦不久於世有譽死六年臣果卒亦三十有六臣字子相揚州興化人出刑部主事調考功謝病歸築室百花洲上讀書其中起故官移文逸進稽勲員外郎嚴嵩惡之出爲福建參議倭薄城臣守西門納鄉人避難者萬人或言賊且迫曰我在不憂賊也與主者共擊退之尋遷提學副使卒官士民皆哭中行字子與良興人美姿容善飲酒出刑部主事歷員外郎郎中稍遷行

知府廣東賦壽五來犯禦之有由其且之傳武平令徐
宰邀擊之讓功甫宰甫宰得優恩尋以父憂歸補汝寧坐大
計貶長蘆鹽運判官遷湖廣僉事掩捕湖盜柯彩鳳得其積
所活飢民萬餘累官江西左布政使萬曆六年卒官僚屬相
哭士民亦巷哭中行性好客無賢愚貴賤應之不倦故其死
也人多哀之國倫字明卿興國人由中書舍人擢兵科給事
中楊繼盛死倡衆賻送忤嚴嵩假他事謫江西按察司知事
量移南康推官調歸德居二歲棄去嵩敗起建寧同知累遷
河南左參政大計罷歸國倫才氣橫放好客輕財歸田後聲
名籍甚求名之士不東走太倉則西走典國萬曆時世貞旣
歿國倫猶無恙在七子中最爲老壽

王世貞字元美太倉人兵部侍郎倬孫右都御史忬子也生有異稟書過目終身弗忘十五咏寶刀老宿皆賞異舉嘉靖二十六年進士年方十九好爲詩古文及官刑部主事入王宗沐李先芳吳維岳等詩社諸人多外遷又與李攀龍宗臣梁有譽徐中行吳國倫輩紹述何李排擊王唐名日益盛屢遷員外郎郎中奸人閹姓者犯法錦衣都督陸炳匿諸家世貞搜得之炳介嚴嵩以請不許楊繼盛下吏時進湯藥其妻訟夫冤爲代草旣死復棺殮之嵩大恨吏部兩擬提學皆不用用爲青州兵備副使父忬以灤河失事嵩惡世貞構忬於帝論死繫獄世貞解官奔赴與弟世懋日蒲伏嵩門涕泣求貸嵩陰持忬獄而時爲謾語以寬之兩人又日囚服跽道

遮諸貴人輿搏頽乞救請貴人畏嵩不敢言忤竟死西市兄弟哀號欲絕持喪歸皆蔬食三年不入內寢既除服猶却冠帶直履葛巾不赴宴會隆慶元年八月兄弟伏闕訟父冤言爲嵩所害大學士徐階左右之復忤官世貞意不欲出會詔求直言疏陳法祖宗正殿名廣恩義寬禁例修典章推德意昭爵賞練兵實八事以應詔無何吏部用言官薦令以副使涖大名猶不欲出攀龍等以大義曉之乃就官遷浙江右參政山西按察使母憂歸服除補湖廣旋改廣西右布政使入爲太僕卿萬曆二年九月以右副都御史撫治郎陽數條奏屯田戍守兵食事宜咸切大計有奸僧僞稱樂平王次子奉高皇帝御容金牒行遊天下世貞曰宗藩不得出城而壽張

如此必僞也捕訊之果僞遂服辜張居正枋國以世貞同年生有意引之世貞不甚親附所部荊州地震引京房占謂臣道太盛坤維不寧用以諷居正居正婦弟辱江陵令世貞論奏不少貸居正積不能堪會遷南京大理卿爲給事中楊節所劾卽取旨罷之後起應天府尹復被劾罷居正歿起南京刑部右侍郎辭疾不赴久之所善王錫爵秉政起南京兵部右侍郎先是世貞爲副都御史及大理卿應天尹與侍郎品皆正三世貞通埋前俸得考滿蔭子比擢南京刑部尚書御史黃仁榮言世貞先被劾不當計俸據故事力爭世貞乃三疏移疾歸二十一年卒於家世貞始與李攀龍狎王文柄攀龍歿獨操其柄二十年才最高地望最顯聲華意氣籠蓋海

內舉天下士大夫以及山人詞客納子羽流莫不奔走門下
片言褒賞聲價驟起自來文人字隆名士風雅領袖人倫未
有若世貞之盛者也其持論文必西漢詩必盛唐大曆以後
書勿讀而藻飾太甚晚年攻者漸起世貞顧漸造平淡病亟
時劉鳳往視見其手蘇子瞻集諷翫不置也世貞自號鳳洲
又號弇州山人其所與遊者大氏見其集中前五子篇則攀
龍中行有譽國倫臣也後五子篇則南昌余曰德蒲圻魏裳
歛汪道昆銅梁張佳胤新蔡張九一也廣五子篇則崑山俞
允文濬盧柟濮州李先芳孝豐吳維岳順德歐大任也續五
子篇則陽曲王道行東明石星從化黎民表南昌朱多燧常
熟趙用賢也末五子篇則京山李維楨鄞屠隆南樂魏允中

蘭谿胡應麟也。而用賢復與焉。又作八哀篇紀同郡中老輩。陸治彭年。文嘉陳鏊。陸師道黃姬水。顧聖之錢穀。作四十一詠。紀遠近交游。皇甫汈莫如忠。許邦才周天球。沈明臣王祖嫡。劉鳳張鳳翼。朱多燼。顧孟林殷都。穆文熙。劉黃裳。張獻翼。王穉登。王叔承。周弘禴。沈思孝。魏允貞。喻均。鄒迪光。余翔。張元凱。張鳴鳳。邢侗。鄒觀光。曹昌先。徐益孫。瞿汝稷。顧紹芳。朱器封。黃廷綬。徐桂王。伯稠。王衡。汪道貫。華善繼。張九二。梅鼎祚。吳稼澄之屬。然其所去取頗以好惡爲高下。曰德字德甫。佳。眉字肖甫。九一字助甫。世貞詩所謂吾黨有三甫也。裳字順甫。與曰德俱嘉靖二十九年進士。曰德終福建副使。裳終濟南知府。九一嘉靖三十二年進士。終巡撫寧夏。僉都御史。佳。

胤自有傳道昆字伯玉世貞同年也士大學士張居正亦其

同年生也父七十壽道昆文當其心居正亟稱之世貞乃緣

居正指筆之藝苑卮言曰文繁而口法者于鱗簡而有法者

伯玉也道昆由是名大起官兵部左侍郎世貞亦嘗

却天下稱兩司馬道昆雖感林居四方乞詩文者填戶靡不

滿意而去然平日好大言蘇軾爲不通世貞後自以獎

道昆爲過云應麟幼能詩萬曆四年舉於鄉久不第築室山

中購書四萬餘卷手自編次多所撰著攜詩謁世貞世貞喜

而激賞之歸益自負所著詩藪二十卷大抵奉世貞卮言爲

律令而敷衍其說謂千古之詩莫益於有明李何李王四家

之中牢籠千古總萃百家尤莫盛於世貞詩家之有世貞集

大成之尼父也其貢諛如此世貞弟世懋字敬美嘉靖三十八年成進士卽遭父憂父雪始選南京禮部主事歷陝西福建提學副使再遷太常少卿先世貞三年卒好學善詩文名亞其兄世貞力推引之以爲勝己攀龍道昆輩因稱爲小美世貞子士騏字同伯舉鄉試第一登萬曆十七年進士終吏部員外郎亦能文

歸有光字熙甫崑山人九歲能屬文弱冠盡通五經三史諸書師事同邑魏校嘉靖十九年舉鄉試八上春官不第徙居嘉定安亭江上讀書談道學徒從者數百人稱爲震川先生四十四年始成進士授長興知縣用古教化爲治每聽訟引婦女兒童案前刺刺作吳語斷訟遁去不具獄自以大儒卽周

名爲牧伯亦當優假大吏令不便例寢閣不行有所擊斷直
行已意大吏多惡之論調順德通判專轄馬政明世進士爲
令無遷倖者名爲遷實重抑之也隆慶四年大學士高拱趙
貞吉雅知有光引爲南京太僕丞留掌內閣制敕房修世宗
實錄卒官有光爲古文原本經術好太史公書得其神理時
王世貞主盟文壇有光力相觝排目爲妄庸巨子世貞大憾
其後亦心折有光爲之讚曰千載有公繼韓歐陽余豈異趨
久而自傷其推重如此錢謙益遂卽其言以詆世貞然操觚
家從此鮮實學而妄談歐曾亦不能無弊云有光少工舉子
業與胡友信楊起元湯顯祖先後齊名世以配王鏊唐順之
薛應旂瞿景淳所謂八大家也諸八各見傳中惟友信功名

不顯友信德清人隆慶二年進士順德印縣有治績卒官有光少子子慕字季思舉萬曆十九年鄉試再被放卽屏居江村讀書其中與無錫高攀龍最善歿巡按御史郝彪佳請於朝贈翰林待詔

何良俊字元朗松江華亭人王圻子元翰上海人良俊少篤學與弟良傅竝負俊才良傅舉進士官南京禮部郎中而良俊猶滯場屋與上海張之象同里徐獻忠董宜陽竝有聲良俊以嘉靖中歲貢生入國學當路知其名用蔡羽例特授南京翰林院孔目趙貞吉王維禎相繼掌院事與相得甚歡良俊居久之意不樂慨然歎曰吾有清森閣在海上藏書四萬卷名畫百卷古書十種樂此不居而僕僕牛馬走

乎遂移疾歸凡所纂輯咸爲世稱獻忠字伯臣嘉靖中舉於鄉官奉化知縣旣歸著書數百卷宜陽字子元工詩文兼善古人書法之象字月麓由諸生入國學授浙江按察司知事以吏隱自命歸益務誤著晚居秀林山罕入城市三人者皆良俊所與友也圻舉嘉靖四十四年進士除清江知縣調萬安擢御史忤時相出爲福建按察僉事歷官陝西布政參議乞養歸築室淞江之濱種梅萬樹目曰梅花源杜門著述耄而不倦有續文獻通考諸書行世初圻以奏議爲趙貞吉所推張居正與貞吉交惡諷圻攻之不應高拱爲圻座主時方修涼徐階又以爲私其鄉人不助已不能無恚遂摭拾之竟以外僚終云

徐渭字文長山陰人十餘歲傲揚雄解嘲作釋毀長師同里
季本爲諸生有盛名總督胡宗憲招致幕府與歙余寅鄞人
沈明臣同筦書記宗憲得白鹿將獻諸朝令渭草表并他客
草寄所善學士擇其尤者上之學士以渭表進世宗大悅益
寵異宗憲宗憲以是益重渭宗憲嘗宴將吏於爛柯山酒酣
樂作明臣作鏡歌十章中有云狹巷短兵相接處殺人如草
不聞聲宗憲起捋其鬚曰何物沈生雄快乃爾卽命刻於石
寵禮與渭埒督府勢嚴重將吏莫敢仰視渭角巾布衣長揖
縱談幕中有急需夜深開戟門以待渭或醉不至宗憲顧善
之寅明臣亦頗負聲岸以侃直見禮渭知兵好奇計宗憲擒
徐海誘王直皆預其謀藉宗憲勢頗橫及宗憲下獄渭懼禍

遂發狂引巨錐刺耳深數寸又以椎碎腎囊皆不死已又擊
殺繼妻論死繫獄里人張元怵方救得免乃游金陵抵宣遼
縱觀諸邊阨塞善李成梁諸子入京師主元怵元怵導以禮
法渭不能從久之怒而去後元怵卒白衣往弔撫棺慟哭不
告姓名去諸子追及哭而拜諸途渭天才超軼詩文絕出倫
輩善草書工寫花草竹石嘗自言吾書第一詩次之文次之
畫又次之當嘉靖時王李倡七子社謝榛以布衣被擯渭憤
其以軒冕壓韋布誓不入二人黨後二十年公安袁宏道游
越中得涓殘帙以示祭酒陶望齡相與激賞刻其集行世寅
字仲房明臣字嘉則皆有詩名

明史彙

列傳第一百六十三終

明史藁

列傳第一百六十四

光祿大夫 經筵講官明史總裁戶部尚書加七級臣王鴻緒奉

敕編撰

文苑四

李維楨

王穉登

俞允文王叔承

屠隆

唐時升

婁堅程嘉燧

李流芳

焦竑

董其昌

莫如忠米萬鍾

邢侗

黃輝

袁宏道

鍾惺譚元春

郝敬

王惟儉

曹學佺

陳仁錫

艾南英

章世純羅萬藻

陳際泰

張溥

曾異撰

李維楨字本寧京山人父裕福建布政使維楨舉隆慶二年

進士由庶吉士授編修萬曆時穆宗實錄成進修撰出爲陝西右參議遷提學副使浮湛外僚幾三十年天啓初以布政使家居年七十餘矣會朝議登用者舊召爲南京太僕卿旋改太常未赴聞諫官有言力辭不就時方修神宗實錄僉以維楨擅史才且通籍五十餘年熟諳先朝政事宜領史局給事中薛大中特疏薦之未及用四年四月太常卿董其昌復薦之乃召爲禮部右侍郎甫三月進尙書竝在南京維楨緣史事起用乃館中諸臣憚其以前輩壓已不令入館但超遷其官維楨亦以年衰明年正月力乞骸骨去又明年卒於家年八十崇禎時贈太子太保維楨弱冠登朝博聞強記與同館許國齊名館中爲之語日記不得問老許做不得問小李

維楨性不能飲讀書之外泊然無所嗜爲人樂易濶達賓客
維進有背負者窮而來歸遇之益厚其文章弘肆有才氣海
內請求者無虛日能屈曲以副其所望碑版之文照耀四裔
門下士招富人大賈受取金錢代爲請乞亦應之無倦負重
名垂四十年然文多率意應酬品格不能高也

王穉登字伯穀長洲人四歲能屬對六歲善擘窠大字十歲
能詩長益駿發有盛名嘉靖末遊京師客大學士袁煒家煒
試諸吉士紫牡丹詩不稱意命穉登爲之有警句煒名數諸
吉士曰君輩職文章能得王秀才一句耶將薦之朝不果未
幾煒卒穉登往哭其墓隆慶初復遊京師徐階當國頗修憾
於煒或勸穉登弗名袁公客不從刻燕市客越二集備書其

事吳中自文徵明後風雅無定屬穉登嘗及徵明門遙接其風主詞翰之席者三十餘年四方士道吳門者雖賈人窮子必踵門求見丐其寸楮尺素然後去嘉隆萬曆間布衣山人以詩名者十數俞允文王叔承沈明臣輩尤爲世所稱然聲華烜赫穉登爲最申時行以元老里居特相推重王世貞與同郡友善顧不甚推之及世貞歿其仲子士驢坐事繫獄穉登爲傾身救援人以是重其風義萬曆中詔修國史大學士趙志臯輩薦穉登及其同邑魏學禮江都陸弼黃岡王一鳴有詔徵弼未上而史局罷卒年七十餘子留字亦房亦以詩名允文字仲蔚崑山人也其父舉進士官大理評事允文年十三而孤十五爲馬鞍山賦援據該博長老異之邑人歸有

光以古文名允文與角立年未四十謝去諸生專力於詩文
書法與王世貞善而不喜李攀龍詩其持論不苟同如此叔
承字承父吳江人少孤治經生業以好古謝去貧贅婦家爲
婦翁所逐不予一錢乃攜婦歸奉母貧益甚入都客大學士
李春芳所性嗜酒飲可一石春芳有所誤述覓之往往臥酒
樓欠伸弗甯應久之乃謝歸太倉王錫爵其布衣交也再召
會有三王竝封之議叔承遺書數千言謂當引大義以去就
力爭不當依違兩端負主恩辜物望錫爵得書歎服其詩極
爲世貞兄弟所許卒於萬曆中

屠隆字長卿鄞人生有異才學詩於沈明臣落筆數千言立
就族人大山里人張時徹方爲貴官共相延譽名大噪舉萬

曆五年進士除潁上知縣調繁青浦時招名士飲酒賦詩游九峰三泖以仙令自許然於吏事不廢士民皆愛戴之遷禮部主事西寧侯宋世恩兄事隆宴游甚歡刑部主事俞顯卿者險人也嘗爲隆所詆心恨之訐隆與世恩淫縱詞連禮部尙書陳經邦隆等上疏自理并列顯卿挾仇誣陷狀所司乃兩黜之而停世恩俸半歲隆歸道青浦父老爲斂田千畝請徒居隆不許歡飲三日謝歸隆束髮名高睥睨一世壯年被放益縱詩酒好賓客然家故貧又不善治生益窘乃賣文爲活詩文率不經意一揮數紙嘗戲命兩人對案分拈二題各賦百韻咄嗟之間二草竝就又與人對奕口誦詩文命人書之書不逮誦也子婦沈氏天孫修撰懋學女也與隆女瑤瑟

能詩隆有所作兩人輒和之天孫卒年二十一瑤瑟年二
十七兩家兄弟合刻其詩曰留香草

唐時升字叔達嘉定人父欽訓與歸有光善故時升早登有
光之門年未三十謝舉子業專意古學王世貞官南都延之
邸舍與辨晰疑義時升自以出歸氏門不肖復稱王氏弟子
及王錫爵枋國其子衡邀時升入都值塞上用兵逆斷其情
形虛實將帥勝負無一爽者家貧好施予灌園藝蔬蕭然自
得詩援筆成不加點竄文得有光之傳與里人婁堅程嘉燧
竝稱曰練川三老卒於崇禎九年年八十有六堅字子柔幼
好學其師友皆出有光門堅學有師承經明行修鄉里推爲
大師貢於國學不仕而歸工書法詩亦清新四明謝三賓知

縣事合時升堅嘉燧及李流芳詩刻之曰嘉定四先生集流芳字長蘅萬曆三十四年舉於鄉工詩善書尤精繪事天啟初會試北上抵近郊聞警賦詩而返遂絕意進取嘉燧字孟陽休寧人僑居嘉定少學科舉業不成乃讀古書工詩善畫與通州顧養謙善友人勸詣之乃渡江寓古寺與酒人歡飲三日夜賦咏古五章不見養謙而返崇禎中常熟錢謙益以侍郎罷歸築耦耕堂邀嘉燧讀書其中閱十年返休寧遂卒年七十有九謙益最重其詩稱曰松圓詩老松圓者嘉燧所居處又崑山王志堅字弱生舉萬曆三十八年進士授南京兵部主事歷官僉事督湖廣學政卒官謙益序其詩曰志堅少與李流芳同學爲詩文法唐宋名家通籍後卜居吳門古

南園杜門却掃肆志讀書先經後史先史後子集其讀經先箋疏而後辨論讀史先證據而後發明讀子則謂唐宋而後無子當取說家之有裨經史者補之讀集則定秦漢以後古文爲五編考覈唐宋碑志援史傳摭雜說以參覈其事之同異文之純駁篇章甚富自定詩才七十餘首蓋許其矜慎得讀書法也

焦竑字弱侯江寧人爲諸生有盛名從督學御史耿定向學復質疑於羅汝芳舉嘉靖四十三年鄉試下第還定向遴十四郡名士讀書崇正書院以竑爲之長及定向里居復往從之萬曆十七年始以殿試第一人官翰林修撰益討習國朝典章二十二年大學士陳于陞建議修國史欲竑專領其事

竝遜謝乃先撰經籍志其他率無所撰館亦竟罷翰林教小
內侍書者衆視爲具文竝獨曰此曹他日在帝左右安得忽
之取古奄人善惡時與論說皇長子出閣竝爲講官故事講
官進講罕有問者竝講畢徐曰博學審問功用維均敷陳或
未盡惟殿下賜明問皇長子稱善然無所質難也一日竝復
進曰殿下言不易發得毋諱其誤耶解則有誤問復何誤古
人不恥下問願以爲法皇長子復稱善亦竟無所問竝與同
列謀曰吾儕啓其端以便下問若何衆然之適講舜典竝舉
稽于衆舍已從人爲問皇長子曰稽者考也考集衆思然後
舍已之短從人之長又一日舉上帝降衷若有恒性皇長子
曰此無他卽天命之謂性也時方十三齡荅問無滯中外咸

知睿質之美亦由竑善啓迪也嘗講次羣鳥飛鳴皇長子仰
視竑輒肅立輟講皇長子斂容聽乃復講如初竑嘗爲養正
圖說採古儲君事可爲法戒者擬進之同官郭正域輩惡其
不相聞目爲賈譽竑遂止竑旣負重名性復疎直時事有不
可輒形之言論政府亦惡之張位尤甚二十五年主順天鄉
試舉子曹蕃等九人文多險誕語竑被劾謫福寧州同知歲
餘大計復鐫秩竑遂不出竑博極羣書自經史至稗官雜說
無不淹貫善爲古文典正馴雅卓然名家集名澹園竑所自
號也自未仕至家居無日不講學以汝芳爲宗而善定向兄
弟及李贄時頗以禪學譏之萬曆四十八年卒年八十熹宗
時以先朝講讀恩復官贈諭德賜祭廕子福王時追諡文端

子潤生見忠義傳

董其昌字元宰松江華亭人父漢儒有學行其昌初就塾比夜父從枕上授經悉能誦記舉萬曆十七年進士改庶吉士禮部侍郎田一儁以教習卒官其昌請假走數千里護其喪歸葬還授編修皇長子出閣充講官因事啓沃皇長子每目屬之坐失執政意出爲湖廣副使移疾歸起故官督湖廣學政不徇請囑爲勢家所怨嗾生儒數百人鼓譟毀其公署其昌卽拜疏求去帝不許而令所司按治其昌卒謝事歸起山東副使登萊兵備河南參政竝不赴光宗立問舊講官董先生安在乃名爲太常少卿掌國子司業事天啓二年擢本寺卿兼侍讀學士時修神宗實錄命往南方採輯先朝章疏及

遺事其昌廣搜博徵錄成三百本又採留中之疏切於國本
藩封人才風俗河渠食貨吏治邊防者別爲四十卷倣史贊
之例每篇繫以筆斷書成表進有詔褒美宣付史館明年秋
擢禮部右侍郎協理詹事府事尋轉左侍郎五年正月拜南
京禮部尙書時政在奄豎黨禍酷烈其昌澗自引遠踰年請
告歸崇禎四年起故官掌詹事府事居三年屢疏乞休詔加
太子太保致仕又二年卒年八十有二贈太子太傅福王時
諡文敏其昌天才俊逸少負重名在講席見知光宗爲僉人
所忌其後魏璫熏燻衣冠奄人請書翰者一切謝絕然不激
不隨故得免於黨人之禍初華亭自沈度沈粲以後南安知
府張弼詹事陸澗布政莫如忠及子是龍皆以善書稱其昌

後出超越諸家獨探神妙始以朱米芾爲宗後遂錯綜晉唐諸帖而變化之自成一家名聞外國其畫集宋元諸家之長行以已意瀟灑生動非人力所及也四方金石之刻得其制作手書以爲一絕造請無虛日尺素短札流布人間爭購寶之精於品題收藏家得片語隻字以爲重性和易通禪理蕭間吐納終日無俗語人儼之米芾趙孟頫云同時以善書名者臨邑邢侗順天米萬鍾晉江張瑞圖時人謂邢張米董又曰南董北米然三人者不逮其昌遠甚莫如忠字子良嘉靖十七年進士累官浙江布政使潔修自好夏言死經紀其喪善草書詩文有體要是龍字雲卿後以字行更字廷韓十歲能文長善書皇甫汈王世貞輩亟稱之以貢生終邢侗字子

愿萬曆二年進士終陝西行太僕卿家資鉅萬築來禽館於古犁丘減產奉客遂致中落妹慈靜善倣兄書米萬鍾字友石萬曆二十三年進士歷官江西按察使天啓五年魏忠賢黨倪文煥劾之遂削籍崇禎初起太僕少卿卒官張瑞圖者官至大學士逆案中人也

黃輝字平倩一字昭素南充人幼穎異父子元官湖廣御史屬訊疑獄輝檢律定讞如老吏御史聞而異之命負以至授錢穀集一覽輒記稍長博極羣書年十五舉鄉試第一登萬曆十七年進士改庶吉士館課文字多沿襲熟爛目爲翰林體及李攀龍王世貞之學行則又改而從之輝刻意學古一以韓歐爲師館閣文稍變時同館中詩文推陶望齡書畫推

董其昌輝詩及書與齊名至徵事輝十得八九焦竑以閎雅名亦自遜不如也由編修遷右中允充皇長子講官時帝寵鄭貴妃疎皇后長子長子生母王恭妃幾殆輝從內豎徵知其狀謂同里給事中王德完曰此國家大事旦夕不測書之史冊謂朝廷無人吾輩爲萬世僂矣德完奮然屬輝具草上之下獄廷杖瀕死輝周旋橐籥不避險阻人或危之輝曰吾陷人於禍可坐視乎輝雅好禪學多方外交爲言者所論時已爲庶子掌司經局謙請告歸已起故官擢少詹事兼侍講學士卒官

袁宏道字中郎公安人與兄宗道弟中道竝有才名時稱三袁宗道字伯修萬曆十四年會試第一授庶吉士進編修卒

官右庶子泰昌時追錄光宗講官贈禮部右侍郎宏道年十六爲諸生卽結社城南爲之長間爲詩歌古文有聲里中舉萬曆二十年進士歸家下帷讀書詩文主妙悟選吳縣知縣聽斷敏決公庭鮮事與士大夫談說詩文以風雅自命意有所不樂解官去徧遊吳越佳山水起授順天教授歷國子助教禮部主事謝病歸築園城南植柳萬株號曰柳浪與中道及一二老衲居焉久之起故官尋以清望擢吏部驗封主事改文選署司事故事選人掣簽時諸瑣事悉曹郎躬親之吏無敢近者一老吏排闥入自陳受人金欲與善地後又擅留姻戚之罷官者宏道憤縛送刑部置重辟都人大快尋移考功員外郎立歲終考察羣吏之法言外官三歲一察京官六

歲武官五歲此曹安得獨免疏上報可遂爲定制遷稽勲郎中後謝病歸數月卒中道字小修十餘歲作黃山雪二賦五千餘言長益豪邁從兩兄宦游京師多交四方名士足跡半天下萬曆三十一年始舉於鄉又十四年乃成進士由徽州教授歷國子博士南京禮部主事天啓四年進南京吏部郎中卒於官先是王李之學盛行袁氏兄弟獨心非之宗道在館中與同館黃輝力排其說於唐好白樂天於宋好蘇軾名其齋曰白蘇至宏道益矯以清新輕俊學者多舍王李而從之目爲公安體然戲謔笑間雜俚語空疎者便之其後王李風漸熄而鍾譚之說大熾鍾譚者鍾惺譚友夏也中道憂之將昌言掎擊然時方競趨不能止有子曰祈年出後宏道

少有俊才舉於鄉早卒惺字伯敬景陵人萬曆三十八年進士授行人稍遷工部主事尋改南京禮部進郎中擢福建提學僉事以父憂歸卒於家惺貌寢羸不勝衣爲人嚴冷不喜接俗客由此得謝人事官南都餽秦淮水閣讀史恒至丙夜有所見卽筆之名曰史懷愛名山水所至必遊不極幽邃不止晚逃於禪以卒自宏道矯王李詩之弊倡以清真惺復矯其弊變而爲幽淡孤峭與同里譚元春評選唐人之詩爲唐詩歸又評選隋以前詩爲古詩歸鍾譚之名滿天下謂之景陵體然兩人學不甚富其識解多僻大爲通人所譏元春字友夏名輩後於惺以詩歸故與齊名至天啓七年始舉鄉試

第一惺已前卒矣

郝敬字仲輿京山人父承健舉於鄉官肅寧知縣敬幼稱神童性跼弛嘗殺人繫獄父友李維楨援出之館於家始折節讀書舉萬曆十七年進士歷知縉雲永嘉二縣有能聲徵授禮科給事中乞假歸養久之補戶科數有所論奏山東稅監陳增貪橫爲益都知縣吳宗堯所奏帝不罪敬上言開採不罷則陛下明旨不過爲愚弄臣民之虛文乞先停止然後以宗堯所奏下撫按勘覈正增不法之罪不聽頃之山東巡撫尹應元亦極論增罪帝怒切責應元斥宗堯爲民敬上言陛下處陳增一事甚失衆心自今宦豎之虐焰漲天忠臣之正氣埽地外廷之讜論絕響讒夫之利口橫生天下事莫知所底帝怒奪俸一年帝遣中官高竈權稅京口暨祿權稅儀真

敬復力諫宗堯之幼增也增怒甚誣訐其賊私詞連青州一府官僚劾引商民吳時奉等請皆籍沒帝輒可之敬復力詆增乞速寢其奏亦不納爲要人所惡謫知江陰縣貪污不檢物論皆不予遂投劾歸杜門著書崇禎十二年卒

王惟儉字損仲祥符人萬曆二十三年進士授濰縣知縣遷兵部職方主事三十年春遊東總兵官馬林以忤稅使高淮被逮兵部尙書田樂等救之帝怒責職方不推代者空司而遂惟儉亦削籍歸家居二十年光宗立起光祿丞三遷大理少卿天啓三年八月擢右僉都御史巡撫山東值徐鴻儒之亂民多逃亡遼人避難來者亦多失所惟儉加意綏輯五年三月擢南京兵部右侍郎未赴入爲工部右侍郎魏忠賢黨

御史田景新劾之落職閒住惟儉資敏嗜學初被廢肆力經史百家苦宋史繁蕪手加刪定自爲一書好書畫古玩典衣舉息務求必得萬曆天啓間世所推博物君子惟儉與董其昌竝而嘉興李日華亞之日華字君實嘉興人萬曆二十年進士官至太僕少卿恬澹和易與物無忤惟儉則口多微詞好抨擊道學人不能堪嘗與時輩讌集徵漢書一事具悉本末指其腹笑曰名下寧有虛士乎其自喜如此

曹學佺字能始侯官人弱冠舉萬曆二十三年進士授戶部主事中察典調南京添注大理左寺正居冗散七年肆力於學累遷南京戶部郎中四川右參政按察使蜀府燬於火估修資七十萬金學佺以宗藩條例却之又中察典議調天啓

一年起廣西右參議初挺擊獄興劉廷元輩主瘋癲學佺著
野史紀略直書事本末至六年秋學佺遷陝西副使未行而
廷元附魏忠賢大幸乃劾學佺私撰野史淆亂國章遂削籍
燬所鏤板巡按御史王政新以嘗薦學佺亦勒閒住廣西大
吏揣學佺必得重禍羈留以待已知忠賢無意殺之乃得釋
還崇禎初起廣西副使力辭不就家居二十年著書所居石
倉園中爲石倉十二代詩選盛行於世嘗謂二氏有藏吾儒
何獨無欲修儒藏與鼎立采擷四庫書因類分輯十有餘年
功未及竣兩京繼覆唐王立於閩中起授太常卿尋遷禮部
右侍郎兼侍講學士進尙書加太子太保及事敗走入山中
投纒而死年七十有四詩文甚富總名石倉集閩中文風明

初爲盛至萬曆中再盛自學佗倡之

陳仁錫字明卿長安人父允堅進士歷知諸暨崇德二縣仁錫年十九舉萬曆二十五年鄉試開武進錢一本善易往師之得其指要久不第益究心經史之學多所論著天啓二年以殿試第三人授翰林編修時第一爲文震孟亦老成宿學海內咸慶得人明年丁內艱廬墓次服闋起故官尋直經筵典誥勅魏忠賢冒邊功矯旨錫上公箚給世券仁錫當視草持不可其黨以威劫之毅然曰世自有視草者何必我忠賢聞之怒不數日里人孫文豸以誦步天歌見捕坐妖言鍛鍊成獄詞連仁錫及震孟罪將不測有密救者得削籍歸崇禎改元召復故官旋進右中允署國子司業事再直經筵每進

講多指陳時弊以預修神光二朝實錄進右諭德乞假歸越三年卽家起南京國子祭酒甫拜命得疾卒福王時贈詹事諡文莊仁錫講求經濟有志天下事性好學喜著書一時館閣中博洽者鮮其儔云

艾南英字千子東鄉人七歲作竹林七賢論長爲諸生好學無所不窺萬曆末場屋文腐爛南英淡疾之與同郡章世純羅萬藻陳際泰以興起斯文爲任乃刻四人所作行之世世人翕然歸之稱爲章羅陳艾天啓四年南英始舉於鄉座主檢討丁乾學給事中郝士膏發策詆魏忠賢南英對策亦有譏刺語忠賢怒削考官籍南英亦停三科居四年莊烈帝卽位詔許會試久之卒不第而文日有名負氣凌物人多畏而

惡之素所交亦多憚其口始王李之學大行天下談古文者
悉宗之後鍾譚出而一變至是錢謙益負重名於詞林痛相
糾駁南英和之於下排詆王李不遺餘力兩京繼覆江西郡
縣盡失南英乃入閩唐王名見陳十可憂疏授兵部主事尋
改御史明年八月卒於延平世純字大力臨川人博聞強記
舉大啓元年鄉試崇禎中累官柳州知府年已七十矣聞京
師變悲憤遘疾卒萬藻字文止世純同縣人天啓七年舉於
鄉崇禎中行保舉法祭酒倪元璐以萬藻應詔辭不就福王
時爲上杭知縣唐王立於閩擢禮部主事南英卒哭而殯之
居數月亦卒際泰字大士亦臨川人父流寓汀州武平生於
其地家貧不能從師又無書時取券舍兒書屏人竊誦從外

兄所獲書經四角已漫滅且無句讀自以意識別之遂通其
義十歲於外家藥籠中見詩經取而疾走父見之怒督往田
則攜至田所踞高阜而哦遂畢身不忘久之返臨川與南英
輩以時文名天下其爲文敏甚一日可二三十首先後所作
至萬首經生舉業之富無若際泰者崇禎三年舉於鄉又四
年成進士年六十有八矣又三年除行人居四年護故相蔡
國用喪南行卒於道

張溥字天如太倉人伯父輔之南京工部尙書溥幼嗜學所
讀書必手鈔鈔已朗誦一過卽焚之又鈔如是者六七始已
右手握管處指掌成繭數日輒割去冬月手皸日沃湯數次
後名讀書之齋曰七錄以此也爲諸生招同里張采共學益

肆力經史名籍甚號婁東二張崇禎元年以選貢生入都采
方成進士兩人名徹都下已而采官臨川溥歸集郡中名士
相與復古學名其文社曰復社四年成進士改庶吉士以葬
親乞假歸讀書若經生無間寒暑四方噉名者爭走其門盡
名爲復社溥亦傾身結納交游日廣聲氣通朝右所品題甲
乙頗能爲榮辱大吏多承其警欵諸奔走附麗者輒自矜曰
吾以嗣東林也執政大僚由此惡之里人陸文聲者輸貲爲
監生求入社不許采又嘗以事扶之文聲詣闕言風俗之弊
皆原於士子溥采爲主盟倡復社亂天下溫體仁方枋國下
其事於提學御史倪元珙元珙移兵備參議馮元颺元颺下
太倉知州周仲璉遷延久之言復社無可罪三人皆貶斥嚴

旨窮究不已聞人周之夔者嘗爲蘇州推官坐事罷去疑溥爲之恨甚聞文聲訐溥遂伏闕言溥等把持計典已罷職實其所爲因及復社恣橫狀章下巡撫張國維等言之夔去官溥預溥事亦被旨譙讓至十四年溥已卒而事猶未竟刑部侍郎蔡奕琛坐黨薛國觀繫獄未知溥卒也許溥遙握朝柄已罪由溥因言采結黨亂政詔責溥采回奏采上言復社非臣事然臣與溥生平相淬礪死避網羅負義圖全誼不出此念溥日夜解經論文矢心報稱曾未一日服官懷忠入地卽今嚴綸之下并不得泣血自明良足哀悼當是時體仁已前罷繼者張至發薛國觀皆不喜東林故所司不敢覆奏及是至發國觀亦相繼罷而周延儒當國溥座主也其獲再相溥

有力焉故采疏上事卽得解明年御史劉熙祚給事中姜埰
交章言溥砥行博聞所纂述經史有功聖學宜取備乙夜觀
因薦采學行帝御講筵問及二人延儒對曰讀書好秀才帝
曰溥已卒采小臣言官何爲薦之延儒曰二人好讀書能文
章言官爲舉子時讀其文又以其用未竟故惜之耳帝曰亦
未免偏延儒言誠如聖諭溥與黃道周皆偏因善讀書以故
惜之者衆帝領之遂有詔徵溥遺書而道周亦復官有司先
後錄上三千餘卷帝悉留覽溥詩文敏捷四方徵索者率不
起草對客揮毫俄頃立就以故名高一時卒時年止四十采
字受先與溥善溥性寬泛交博愛采特嚴毅喜甄別可否人
有過嘗面叱之知臨川摧強扶弱聲大起移疾歸士民泣送

載道知州劉士斗錢肅樂嚴重之以奸蠹詢采片紙報成置
之法福王時起禮部主事進員外郎乞假去南都失守奸人
素銜采者羣擊之死復用大錐亂刺之已而逃避之鄰邑又
三年卒

曾異撰字弗人晉江人家侯官父爲諸生早卒母張氏以遺
腹生家窶甚紡績給晨夕異撰起孤童事母至孝歲饑採薯
葉雜糠粃食之母妻嘗負畚鋤乾草給爨然性介甚長吏知
其賢欲爲地不屑也久爲諸生見天下多故究心經世學其
所言皆可見之行事詩有奇氣然太近詭吳興潘曾紘督學
政上其母節行獲旌於朝及曾紘巡撫南贛得王惟儉所撰
宋史招異撰及新建徐世溥更定未成而罷崇禎十二年舉

鄉試年四十有九矣再赴會試還遂卒

明史業

列傳第一百六十四終